

وَأَتُوا النِّسَاءَ صَدَقَاتِهِنَّ مَخْلُوفًا
فَإِنْ طِبْنَ لَكُمْ عَنْ شَيْءٍ مِّنْهُ
نَفْسًا فَكُلُوهُ هَنِيئًا مَّرِيئًا

এবং তোমরা স্ত্রীলোকদিগকে তাহাদের দেন-
মহর স্বেচ্ছায় প্রদান কর। অতঃপর, তাহারা
যদি স্বতঃপ্রবৃত্ত হইয়া উহা হইতে কিয়দংশ
তোমাদিগকে দিয়া দেয়, তাহা হইলে, তোমরা
উহা সানন্দে ও তৃপ্তি সহকারে ভোগ কর।
(সূরা নিসা, আয়াত: ৫)



সৈয়্যদনা হযরত আমীরুল
মোমিনীন খলীফাতুল মসীহ আল
খামেস (আইঃ) আল্লাহর কৃপায়
কুশলে আছেন। আলহামদৌ
লিল্লাহ। জামাতের সদস্যদের
নিকট হুযূর আনোয়ারের
সুসাস্থ্য, দীর্ঘায়ু এবং হুযূরের
যাবতীয় উদ্দেশ্যাবলী পূর্ণ
হওয়ার জন্য ও তাঁর নিরাপত্তার
জন্য দোয়ার আবেদন রইল।
আল্লাহ তা'লা সর্বদা হুযূরের
রক্ষক ও সাহায্যকারী হন।
আমীন।

আমি লক্ষ্য করছি যে মানুষ এই কারণে নামাযের বিষয়ে উদাসীন এবং অলস হয়ে থাকে,
কেননা তারা সেই আনন্দ তৃপ্তি সম্পর্কে অনভিজ্ঞ যা আল্লাহ তা'লা এর মধ্যে নিহিত রেখেছেন।

হযরত মসীহ মওউদ (আ.)-এর বাণী

খোদার বশ্যতা স্বীকার এবং ঐশী প্রতিপালনগুণের মধ্যে পারস্পরিক সম্পর্ক

নিদারূণ উৎকর্ষা আমাকে ঘিরে ধরে এবং কখন কখন এই বেদনায়
মন ব্যথিত হয়ে ওঠে, যখন দেখি যে কোনও ব্যক্তি একদিনের জন্য মুখে
স্বাদ হারিয়ে ফেলে আর ডাক্তারের কাছে গিয়ে কিরূপ অনুন্নয় বিনয় ও
তোষামোদ করে, অর্থ ব্যয় করে এবং পূর্বের স্বাদ ফিরে পেতে কষ্ট সহ্য
করে। যে নপুংসক নারীসন্তোগে তৃপ্তি পায় না, অনেক সময় তারা এতটাই
অবসাদগ্রস্ত হয়ে পড়ে যে আত্মহত্যা করতে পর্যন্ত মনস্থির করে ফেলে, আর
প্রায় এই ধরণের মৃত্যু হয়ে থাকে। কিন্তু আক্ষেপ! কৃতকার্যতা লাভে ব্যর্থ
সেই হ্রদরোগী কেন চেষ্টা করে না, যে কিনা ইবাদত উপভোগ করে না? কেন
সে দুঃখে জর্জরিত হয় না? জাগতিকতা এবং পার্থিব সুখের জন্য সে কত
কিই না করে, কিন্তু শ্বাস্থ ও প্রকৃত সুখের জন্য সে কোনও ব্যগ্রতা ও
ব্যকুলতা অনুভব করে না। এমন ব্যক্তি কতই না দুর্ভাগা! কিরূপ বঞ্চিত!
অস্থায়ী এবং ক্ষণস্থায়ী সুখ লাভের চিকিৎসার সন্ধান করে সে অবশেষে তা
পেয়ে যায়। তবে কি এটা সম্ভব যে স্থায়ী ও নিরন্তর সুখের জন্য কোন চিকিৎসা
নেই? আছে, নিশ্চয় আছে, কিন্তু সত্যের সন্ধান চায় অধ্যবসায় এবং অবিচলতা।
কুরআন করীমে এক স্থানে আল্লাহ তা'লা পুণ্যবানদেরকে নারীদের সঙ্গে
সাদৃশ্য দিয়েছেন। এর মধ্যেও এক নিগূঢ় তত্ত্ব নিহিত আছে। ঈমান
আনয়নকারীদের উপমা দেওয়া হয়েছে মরিয়ম এবং আসিয়ার ন্যায়, অর্থাৎ
খোদা তা'লা মুশরিকদের মধ্য থেকে মোমেনকে সৃষ্টি করেন। যাইহোক
নারীদের উপমা দেওয়ার মাধ্যমে এক সূক্ষ্ম রহস্য উদ্ঘাটিত হয়েছে। অর্থাৎ
যেভাবে নারী ও পুরুষের পারস্পরিক সম্পর্ক থাকে, অনুরূপভাবে খোদার
প্রতি মানুষের বশ্যতা এবং ঐশী প্রতিপালন-গুণের মধ্যে পারস্পরিক সম্পর্ক
রয়েছে। নারী ও পুরুষের মধ্যে যদি পারস্পরিক বোঝাপড়া থাকে এবং তারা
পরস্পরের প্রতি আকৃষ্ট হয়, তবে এমন দম্পতি কল্যাণমণ্ডিত এবং ফলদায়ী
হয়। অন্যথায় সংসারে বিশৃঙ্খলা দেখা দেয় এবং এই সম্পর্কের প্রকৃত উদ্দেশ্য
অধরা থেকে যায়। এক্ষেত্রে পুরুষেরা পরকীয়ায় লিপ্ত হয়ে শয়ে শয়ে রোগ
ব্যধিতে আক্রান্ত হয়। তাদের মধ্যে অনেকে উপদংশের মত সংক্রামক ব্যধির
সংস্পর্শে এসে ইহজাগতিক আনন্দ-সুখ থেকে বঞ্চিত হয়। তাদের সন্তান
হলেও কয়েক প্রজন্ম পর্যন্ত এই ব্যধির প্রভাব অব্যাহত থাকে। অপরদিকে
নারী অশালীন জীবনযাপনে অভ্যস্ত হয়ে পড়ে, অথচ নিজের সন্তান ও মর্যাদাহানি

করেও প্রকৃত সুখ অর্জন করতে পারে না। কাজেই স্বামী ও স্ত্রীর মধ্যকার
প্রকৃত সম্পর্কের বিচ্ছেদ ঘটলে নিদারূণ অশুভ পরিণাম এবং কলহ সৃষ্টি হয়।
অনুরূপভাবে মানুষ আধ্যাত্মিক সম্পর্ক ছিন্ন করে সমস্যার দুর্বিপাকে আবদ্ধ
হয়ে নিঃসঙ্গ পরিত্যক্ত হয়। এমন ব্যক্তি দুঃখ-কষ্টের লক্ষ্যস্থলে পরিণত হয়,
যা জাগতিক সম্পর্কের (বিচ্ছেদের) থেকেও বেশি প্রবল। ঠিক যেমনটি নারী
ও পুরুষের মধ্যকার সম্পর্ক টিকে থাকার মধ্যে এক প্রকার আনন্দ রয়েছে,
তদ্রূপে খোদার প্রতি মানুষের বশ্যতা এবং ঐশী প্রতিপালনগুণের সম্পর্কের
মধ্যেও এক অসীম আনন্দ নিহিত আছে যা এই সম্পর্ককে নিরন্তর টিকিয়ে
রাখে। সুফীগণ বলেন, যে ব্যক্তি এই আনন্দ লাভ করেছে, সে এই জগত এবং
জগতের সব কিছুর আনন্দকে এর উপর প্রাধান্য দেয়। সারা জীবনে সে যদি
একটি বারের মতও এই অভিজ্ঞতা লাভ করতে সক্ষম হয়, তবে সে এরই
মাঝে বিলীন হয়ে যাবে। কিন্তু মুশকিল হল, পৃথিবীর সংখ্যা গরিষ্ঠ মানুষ এই
রহস্য অনুধাবন করতে পারে নি। তাদের নামায মাথা ঠোকা এবং অনীহাভরে
ও বহু কষ্টে ওঠাবসার নামাস্তর মাত্র। আমার আরও বেশি দুঃখ হয়, যখন দেখি
কিছু মানুষ কেবল এই কারণে নামায পড়ে যাতে তাদেরকে পৃথিবীতে
বিশ্বাসযোগ্য এবং সম্মানের অধিকারী হিসেবে গণ্য করা হয়, আর এই নামায
দ্বারা তারা সেই উদ্দেশ্য তাদের অর্জন হয়। অর্থাৎ তারা নামাযী ও পুণ্যবান
হিসেবে খ্যাতি লাভ করে। তবে কেন তাদেরকে এই দুঃখ জর্জরিত করে
তোলে না যে, এক্ষেত্রে এমন মিথ্যা, কৃত্রিম এবং অন্তঃসারশূন্য নামায তাদের
জন্য এমন মর্যাদা এনে দিতে পারে, তবে খোদার প্রকৃত বান্দা হলে কেন
তারা সম্মানিত হবে না? বস্তুত: তাদের জন্য এর থেকে বেশি সম্মান নির্ধারিত
আছে।

নামাযে আনন্দ না আসার কারণ এবং এর প্রতিকার

মোটকথা আমি লক্ষ্য করছি যে মানুষ এই কারণে নামাযের বিষয়ে
উদাসীন এবং অলস হয়ে থাকে, কেননা তারা সেই আনন্দ তৃপ্তি সম্পর্কে
অনভিজ্ঞ যা আল্লাহ তা'লা এর মধ্যে নিহিত রেখেছেন। এর মূল কারণ
এটিই। শহরে ও গ্রামে আরও বেশি উদাসীনতা থেকে থাকে। এদের পঞ্চাশ
শতাংশও যদি সাগ্রহে এবং আন্তরিক ভালবাসা নিয়ে নিজেদের চিরপ্রভুর
প্রতি নতজানু না হয়, তবে প্রশ্ন ওঠে যে কেন তারা সেই আনন্দ সম্পর্কে
অনভিজ্ঞ, কেনই বা তারা এই আনন্দ অনুভব করে নি?

(মালফুযাত, ১ম খণ্ড, পৃ: ১৪০)

জামাত আহমদীয়া যুক্তরাজ্যের ত্রয়োদশতম বাৎসরিক শান্তি সম্মেলনে আমীরুল মু'মেনীন (আইঃ)-এর বরকতময় উপস্থিতি এবং ভাষণ।

জামাত আহমদীয়া যুক্তরাজ্যের ব্যবস্থাপনার অধীনে ১৯ শে মার্চ, ২০১৬ তারিখে লন্ডনের বায়তুল ফুতুহ মসজিদে ত্রয়োদশতম বাৎসরিক শান্তি সম্মেলনের আয়োজন হয়। এই অনুষ্ঠানে সেক্রেটারী অব স্টেট, মেম্বার অব পার্লামেন্ট, কেন্দ্রীয় মন্ত্রীবর্গ, ত্রিশটির অধিক দেশের প্রতিনিধি, সাংবাদিক এবং বিভিন্ন শ্রেণীর বুদ্ধিজীবী ও চিন্তাবিদ, সরকারি অধিকারি, মেয়র, বিভিন্ন ধর্ম সংস্থার কর্ণধার এবং বিভিন্ন পেশার সঙ্গে যুক্ত আহমদী ও অ-আহমদী মুসলমান পুরুষ ও মহিলারা অংশ গ্রহণ করেন। মসজিদে আগত অতিথিবর্গ রেজিস্ট্রেশনের পর তাঁরা কনফারেন্স হলে একত্রিত হন, এরই মাঝে কিছু অতিথিদেরকে মসজিদ বায়তুল ফুতুহ-র বিভিন্ন অংশ পরিদর্শন করানো হয়।

প্রোগ্রামের শেষে হুযুর আনোয়ার ডাইসে আসেন এবং বিসমিল্লাহির রহমানির রহীম এবং এর ইংরাজি অনুবাদ পাঠ করে সভাপতির ভাষণ আরম্ভ করেন।

হুযুর আনোয়ার উপস্থিত অতিথিবর্গকে আসসালামো আলাইকুম-জানান এবং সমস্ত তাদেরকে এখানে উপস্থিত হওয়ার জন্য ধন্যবাদ জ্ঞাপন করেন। তিনি বলেন, বর্তমান পরিস্থিতিতে আপনাদের এখানে এসে এই সম্মেলনে অংশ গ্রহণ করা বিশেষ গুরুত্বের দাবী রাখে কেননা, বর্তমানে বিভিন্ন সন্ত্রাসী গোষ্ঠী ইসলামের নামে অত্যন্ত দুঃখজনক কর্ম করে ইসলামের সুন্দর শিক্ষাকে বদনাম করছে। হুযুর আনোয়ার নভেম্বর মাসে প্যারিস শহরে হওয়া আক্রমণ এবং বিভিন্ন দেশে সংঘটিত সন্ত্রাসী ঘটনাবলীর উল্লেখ করে বলেন যে, যুক্তরাজ্যে এসিস্ট্যান্ট পুলিশ কমিশনার সম্প্রতি একটি বয়ানে সতর্কবাচন দিয়েছেন যে, সন্ত্রাসী গোষ্ঠী 'দাঈশ' এখানে ভয়াবহ হামলার ষড়যন্ত্র রচনা করছিল এবং তাদের আক্রমণের লক্ষ্যস্থল ছিল গুরুত্বপূর্ণ কেন্দ্র এবং সামূহিক ক্ষেত্রগুলি।

হুযুর বলেন, বিগতবছরে ইউরোপে সহসাই বিরাট সংখ্যক শরণার্থী উপস্থিত হয়েছে। যারফলে এখানকার অনেক বাসিন্দা হতাশা, ভয় ও সংশয়ের অনুভূতি নিয়ে কালপাত করছে। এমতাবস্থায় মুসলমানদের পক্ষ থেকে আয়োজিত এই অনুষ্ঠানে আপনাদের মধ্য থেকে অমুসলিমদের অংশ গ্রহণ করা প্রমাণ করে যে, আপনারা সাহসী, সহিষ্ণু এবং উন্মুক্ত মন।

হুযুর বলেন, একটি ঘোর বাস্তব যে, ইসলামের প্রকৃত শিক্ষা থেকে কারোর আতঙ্কিত হওয়ার প্রয়োজন নাই। কিছু মানুষ আছে যারা ইসলামকে উগ্রতাপ্রিয় ধর্ম মনে করে এবং ধারণা করে যে, ইসলাম আত্মঘাতী হামলা বা সন্ত্রাসপূর্ণ কার্যকলাপের অনুমতি দেয়। কিন্তু প্রকৃতপক্ষে এর কোন সত্যতা নেই। সম্প্রতি একজন প্রখ্যাত সংবাদ লেখক একটি পত্রিকায় ইসলামোফোবিয়া (ইসলামাতঙ্ক)-এর ক্রমবর্ধমান প্রবণতা বিষয়ক একটি প্রবন্ধ লেখেন। এই প্রবন্ধে তিনি লেখেন যে, আত্মঘাতী হামলার বিষয়ে দীর্ঘ গবেষণার পর তিনি জানতে পেরেছেন যে, প্রথম আত্মঘাতী হামলা হয় ১৯৮০-এর দশকে। অথচ ইসলামের সূচনা হয়েছে ১৩০০ বছর পূর্বে এবং ইসলামের ইতিহাসে এমন কোন ঘটনা আমাদের চোখে পড়ে না। হুযুর বলেন, তাঁর দলিল খুবই যুক্তিপূর্ণ এবং তিনি সেটি যথাযথভাবেই উপস্থাপন করেছেন। এর থেকে প্রমাণিত হয় যে, আত্মঘাতী হামলা বর্তমান যুগের উদ্ভাবন এবং এর সঙ্গে ইসলামের শান্তিপূর্ণ শিক্ষার কোন দূরতম সম্পর্কও নেই। ইসলাম সকল প্রকারে আত্মহত্যা থেকে স্পষ্টরূপে নিষেধ করে। এই কারণে কোন প্রকারের আত্মঘাতী হামলা বা সন্ত্রাসী হামলার অনুমতি দিতে পারে না। এই ধরনের আক্রমণের ফলে নিরীহ শিশু, মহিলা এবং নিরস্ত্র নির্বিশেষে সকলকে অত্যন্ত অত্যাচারপূর্ণভাবে হত্যা করা হয়।

হুযুর আনোয়ার বলেন, সম্প্রতি টেক্সাসের রাইস ইউনিভার্সিটির প্রফেসর ডব্লিউ কনসিডিন ক্রেগ তাঁর একটি গবেষণামূলক প্রবন্ধে প্রমাণ করেছেন যে, তথা-কথিত ইসলামিক স্টেট (দাঈশ)-এর পক্ষ থেকে খ্রীষ্টানদের উপর যে অত্যাচার করা হচ্ছে নবী করীম (সা.)-এর কোন নির্দেশ বা লেখনী থেকে তার বৈধতা প্রমাণ করা যায় না। তিনি এও লেখেন যে, মহানবী (সা.) ইসলামি সমাজ ব্যবস্থার যে চিত্রাঙ্কন করেছিলেন তার ভিত্তি ধর্মীয় সহিষ্ণুতা এবং নাগরিকদের অধিকার সুরক্ষিত রাখার উপর প্রতিষ্ঠিত ছিল। অতএব এটি পরিক্রম হওয়া উচিত যে, এই সমস্ত উগ্রবাদী গতিবিধি ইসলামি নীতির সম্পূর্ণ পরিপন্থী। ইসলাম যদি কখনো যুদ্ধের অনুমতি দিয়েও থাকে তবে সেটি আত্মরক্ষার জন্য দেওয়া হয়েছিল এবং সেটিও এমন পরিস্থিতিতে

যখন তাঁর উপর জোর করে যুদ্ধ চাপিয়ে দেওয়া হয়েছিল। উদাহরণ স্বরূপ কুরআন শরীফের সূরা হুজ্জ-এর ৪০ নম্বর আয়াতে আল্লাহ তা'লা বলেন যে, “যাহাদের বিরুদ্ধে যুদ্ধ করা হইতেছে তাহাদিগকে (আত্মরক্ষার্থে যুদ্ধ করার) অনুমতি দেওয়া হইল, কারণ তাহাদের উপর যুলুম করা হইতেছে, এবং নিশ্চয় আল্লাহ তাহাদিগকে সাহায্য করিতে পূর্ণ ক্ষমতাবান।

হুযুর আনোয়ার বলেন, ইসলামের প্রারম্ভিক যুগে যে সকল যুদ্ধ হয়েছিল সেগুলি সবই খাঁটি ধর্মীয় যুদ্ধ ছিল যা ধর্মের স্বাধীনতা প্রতিষ্ঠার জন্য প্রয়োজন ছিল। সুতরাং, ইতিহাস থেকে প্রমাণিত হয় যে, এই উদ্দেশ্যে সংঘটিত যুদ্ধগুলিতে শত্রুরা অস্ত্রসজ্জায় সুসজ্জিত ছিল এবং সংখ্যার বিচারে মুসলমানদের তুলনায় কয়েকগুণ ছিল, কিন্তু মুসলমানরা সংখ্যায় কম এবং সম্পূর্ণভাবে অস্ত্রসজ্জিত না হওয়া সত্ত্বেও আল্লাহ তা'লা তাদেরকে জয়যুক্ত করেছেন।

হুযুর আনোয়ার বলেন, একজন মুসলমান হিসেবে যদি আজকের যুগের মুসলমানদের পক্ষ থেকে হওয়া যুদ্ধগুলির বিশ্লেষণ করি তবে আমি দৃঢ় প্রত্যয়ের সঙ্গে বলতে পারি যে, এগুলি ধর্মীয় যুদ্ধ নয়। এর অনেকগুলি কারণের মধ্যে একটি কারণ হল এই যুদ্ধগুলির অধিকাংশই দেশের আভ্যন্তরীণ দ্বন্দ্বের কারণে হয়েছে কিম্বা প্রতিবেশী মুসলমান দেশের বিরুদ্ধে হয়েছে। এবং যে সমস্ত যুদ্ধগুলি অ-মুসলিম দেশের বিরুদ্ধে করা হয়েছে সেগুলিকেও ধর্মীয় যুদ্ধ রূপে গণ্য করা হয় নি। এবং দুই পক্ষ থেকেই মুসলমান সেনা যুদ্ধ করেছে। এটি স্পষ্ট থাকা উচিত যে, বর্তমানের যুদ্ধগুলি ইসলামিক বা কোন ধর্মীয় যুদ্ধ নয় বরং এগুলি অর্থনৈতিক এবং রাজনৈতিক সুবিধা অর্জনের উদ্দেশ্যে হচ্ছে এবং ইসলামের সুনাম হানির কারণ হচ্ছে।

হুযুর বলেন, এতক্ষণ যা কিছু আমি বললাম তার থেকে আপনাদের কাছে বিষয়টি স্পষ্ট হয়ে যাওয়া উচিত যে, সত্য এবং প্রকৃত ইসলাম সম্পর্কে কোন রকম ভীত হওয়ার প্রয়োজন নেই। ইসলাম, উগ্রবাদ, আত্মঘাতী হামলা এবং নির্বিচারে হত্যালীলার কোন ক্রমেই অনুমতি দেয় না। ইসলামোফোবিয়ার কোন বৈধতা নেই, কেননা, ইসলামের প্রকৃত শিক্ষা শান্তি প্রতিষ্ঠা, সহিষ্ণুতা এবং পরস্পরকে শ্রদ্ধা জ্ঞাপনের প্রতিই উদ্বুদ্ধ করে।

ইসলামী শিক্ষা মানবীয় মূল্যবোধকে প্রতিষ্ঠিত করে এবং সমস্ত মানুষের প্রতি সম্মান ও শ্রদ্ধা এবং সকলের জন্য স্বাধীনতার নীতি সমর্থন করে।

হুযুর আনোয়ার বলেন, আরও একটি বিষয় রয়েছে যা একজন মুসলমান হিসেবে আমাকে যুদ্ধের প্রতি আসক্ত হওয়ার পরিবর্তে সমস্ত মানুষকে ভালবাসতে বাধ্য করে এবং সেটি হল কুরআন মজীদে আল্লাহ তা'লা প্রারম্ভিক সূরার দ্বিতীয় আয়াত নিজেই 'সমস্ত জগতের প্রভু-প্রতিপালক' ঘোষণা করেন। এবং তৃতীয় আয়াতে তিনি বলেন, ‘

অতএব, আল্লাহ তা'লা যদি নিজেকে সমস্ত মানুষের প্রভু-প্রতিপালক বলেন এবং অযাচিত-অসীম দাতা, পরম দয়াময়, তবে এটি কিভাবে সম্ভব যে, ঈমান আনয়নকারীদের আদেশ দিবেন তাঁরই সৃষ্টির একাংশকে অন্যায়পূর্ণভাবে হত্যা করতে এবং বা যে কোন প্রকারে কষ্টে নিপতিত করতে? এই প্রশ্নের উত্তর অবশ্যই এটিই হবে যে, এমন আদেশ আল্লাহ তা'লার পক্ষ থেকে হতে পারে না।

হুযুর বলেন, এর বিপরীতে এটি সম্পূর্ণ সত্য যে, আল্লাহ তা'লা অত্যাচার, অমানবীয় আচরণ এবং অন্যায়ের বিরুদ্ধে পদক্ষেপ গ্রহণ করার আদেশ দিয়ে রেখেছেন। ইসলামী শিক্ষানুযায়ী একজন মুসলমানকে একজন অত্যাচারীর হাত থেকে রক্ষা করার, যাবতীয় প্রকারের অন্যায়-অত্যাচারকে সমাজ থেকে দূর করার চেষ্টা করার নির্দেশ দেওয়া হয়েছে।

হুযুর আনোয়ার বলেন, ইসলামী শিক্ষানুযায় এই কাজটি দুইভাবে করা যায়। এক, পারস্পরিক বোঝাপড়া এবং আলোচনার মাধ্যমে সমস্যার সমাধান বের করা। এটি পছন্দনীয় পন্থা। কিন্তু যদি এমনটি সম্ভব না হয় তবে দ্বিতীয় পন্থা অবলম্বন করার আদেশ দেওয়া হয়েছে। অর্থাৎ বলপ্রয়োগের মাধ্যমে অন্যায়কে প্রতিহত কর যাতে সমাজে দীর্ঘস্থায়ী শান্তি প্রতিষ্ঠা সম্ভব হয়।

হুযুর আনোয়ার বলেন, ধর্মের গভীর বাইরেও কিছু বিধি-নিয়ম থাকে যেগুলি উল্লঙ্ঘনকারীদের কে শাস্তি দেওয়া হয়ে থাকে। যদি শাস্তি ছাড়াই

(শেষাংশ ৮ পাতায়...)

জুমআর খুতবা

“হযরত মসীহ মওউদ (আ.)-এর হাতেই যুক্ত হয়ে বান্দা এবং খোদার মধ্যে সত্যিকার সম্পর্ক তৈরী পদ্ধতি আমরা শিখতে পারি এবং শিখেছি। আর খোদা তা'লা যে জীবন্ত সে বিষয়ে পূর্ণ বিশ্বাস এবং তাঁর সন্তুষ্টিতে সন্তুষ্ট থাকার উচ্চ মান অর্জিত হয়।

কিছু চাওয়ার থাকলে সব সময় খোদা তা'লার কাছে চাওয়া অত্যন্ত জরুরী গুণ যা প্রত্যেক ওয়াকফে যিন্দগীকে অবলম্বন করার চেষ্টা করা উচিত।

আমাদের প্রত্যেক ডাক্তার কেবল নিজের পেশাগত দক্ষতা এবং ঔষধের উপর উপরই যেন নির্ভর না করেন, বরং চিকিৎসার পাশাপাশি রুগীর সঙ্গে সদাচরণ করা, তাদের জন্য দোয়া করা এবং নফল পড়া উন্নতি নৈতিক বৈশিষ্ট্যের মধ্যে পড়ে।

ধর্মকে জাগতিকতার উপর প্রাধান্য দানকারী বয়আতের অঙ্গীকারকে নিজ শক্তি ও সামর্থ অনুসারে পালনকারী হযরত মসীহ মওউদ (আ.)-এর হাতে বয়আতকে স্বার্থককারী, খিলাফতে আহমদীয়ার প্রতি পূর্ণ বিশ্বস্ত ও নিষ্ঠাবান, হুকুকুল ইবাদত পালনকারী দৃষ্টান্ত স্থানীয় ওয়াকফে যিন্দগী ইন্দোনেশিয়ার-র রিজিওনাল মুবাল্লিগ ইনচার্জ মাননীয় যুলফিকার আহমদ দামানিক সাহেবের মৃত্যু।

হযরত মসীহ মওউদ (আ.) বলেছিলেন, ‘এঁরা শহীদদের অন্তর্ভুক্ত।’

সৈয়দনা হযরত আমিরুল মোমিনিন খলিফাতুল মসীহ আল খামিস (আইঃ) কর্তৃক ইসলামাবাদ, টিগারফোর্ড (ইউকে) থেকে ১ মে, ২০২০, তারিখে প্রদত্ত খুতবা (১ হিজরত, ১৩৯৯ হিজরী শামসী)

সৌজন্যে: আল-ফযল ইন্টারন্যাশনাল, লন্ডন

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ وَأَشْهَدُ أَنَّ مُحَمَّدًا عَبْدُهُ وَرَسُولُهُ
أَمَّا بَعْدُ فَأَعُوذُ بِاللَّهِ مِنَ الشَّيْطَانِ الرَّجِيمِ - بِسْمِ اللَّهِ الرَّحْمَنِ الرَّحِيمِ -
الْحَمْدُ لِلَّهِ رَبِّ الْعَالَمِينَ - الرَّحْمَنِ الرَّحِيمِ - مَلِكِ يَوْمِ الدِّينِ - إِيَّاكَ نَعْبُدُ وَإِيَّاكَ نَسْتَعِينُ -
اهْدِنَا الصِّرَاطَ الْمُسْتَقِيمَ - صِرَاطَ الَّذِينَ أَنْعَمْتَ عَلَيْهِمْ غَيْرِ الْمَغْضُوبِ عَلَيْهِمْ وَلَا الضَّالِّينَ -

তাশাহুদ, তাউয এবং সূরা ফাতিহা পাঠের পর হুযূর আনোয়ার (আই.) বলেন: এখন আমি কয়েকজন মরহুমের স্মৃতিচারণ করব যারা অতি সম্প্রতি মৃত্যুবরণ করেছেন। তাদের প্রত্যেকেই ভিন্ন ভিন্ন পেশার সাথে সম্পৃক্ত ছিলেন, সবার ভিন্ন ভিন্ন কর্মব্যস্ততা ছিল। শিক্ষাগত যোগ্যতাও তাদের ভিন্ন ভিন্ন ছিল। কিন্তু একটি বিষয় তাদের সবার মাঝে সমান ছিল, আর তা হলো, বয়আতে ধর্মকে জাগতিকতার ওপর প্রাধান্য দেয়ার যে অঙ্গীকার রয়েছে তা তারা নিজেদের সাধ্যমত রক্ষা করেছেন, হযরত মসীহ মওউদ (আ.)-এর হাতে বয়আতের সুবাদে যে দায়িত্ব বর্তায়- তা পালন করেছেন, আহমদীয়া খিলাফতের সাথে পূর্ণ নিষ্ঠা ও বিশ্বস্ততার সম্পর্ক রাখতেন, বান্দার প্রাপ্যপ্রদান করতেন এবং তারা প্রমাণ করেছেন যে, ইসলামের অনিন্দ্য সুন্দর যে শিক্ষাকে প্রতিষ্ঠিত করার উদ্দেশ্যে আল্লাহ তা'লা মহানবী (সা.)-এর নিবেদিত-প্রাণ দাসকে প্রেরণ করেছেন, তাদের মাঝে সেই শিক্ষার ব্যবহারিক চিত্র সত্যিকার অর্থে বিদ্যমান ছিল। আমি বলেছি, তাদের মাঝে একটি বিষয়ে মিল ছিল সত্যিকার অর্থে একটি নয়, বরং বলা উচিত অনেক গুণাবলীর ক্ষেত্রে তাদের মাঝে মিল ছিল। তাদের ঘটনাবলী শুনে এ বিশ্বাস জন্মে যে, এ যুগে হযরত মসীহ মওউদ (আ.)-এর সাথে সম্পৃক্ত হলেই এ সকল বৈশিষ্ট্য সৃষ্টি হয়, বান্দা ও খোদার মাঝে সত্যিকার সম্পর্ক স্থাপনের রীতি শেখা যায় আর আমরা শিখিও বটে, পক্ষান্তরে আল্লাহ তা'লা যে জীবন্ত- এ বিষয়ে পরিপূর্ণ বিশ্বাস আর তাঁর সন্তুষ্টিতে সন্তুষ্ট থাকার উন্নত মান অর্জিত হয়।

আমি যে কয়েকজন প্রয়াত ব্যক্তির স্মৃতিচারণ করব তাদের একজন হলেন, ইন্দোনেশিয়াস্থ আমাদের আঞ্চলিক মুবাল্লিগ জুলফিকার আহমদ দামানিক সাহেব। তিনি গত ২১ এপ্রিল তারিখে ৪২ বছর বয়সে মৃত্যু বরণ করেন, ইনালিল্লাহি ওয়া ইলাইহি রাজেউন। মরহুম ১৯৭৮ সালের ২৪ মে উত্তর

সুমাত্রায় জন্মগ্রহণ করেন। তার পিতার নাম ছিল শেহরোল দামানিক এবং দাদার নাম ছিল শাহনুর দামানিক। মরহুমের বংশে আহমদীয়াতের সূচনা হয় তার দাদার মাধ্যমে, যিনি ১৯৪৪ সালে মওলানা যায়নি দেলান সাহেবের মাধ্যমে বয়আত গ্রহণ করেন। জামা'তের মুবাল্লিগ মরহুম জনাব জুলফিকার সাহেব ১৯৯৭ সাল থেকে ২০০২ সাল পর্যন্ত জামেয়া আহমদীয়া ইন্দোনেশিয়াতে শিক্ষা অর্জন করেন। সেখানে কয়েক বছরের সংক্ষিপ্ত কোর্স হতো। এরপর ১৮ বছর বিভিন্ন জায়গায় মুবাল্লিগ হিসেবে কাজ করার সৌভাগ্য লাভ হয় এবং পরবর্তীতে তিনি বিভিন্ন এলাকায় মুবাল্লিগ হিসেবে দায়িত্ব পালন করতে থাকেন। মৃত্যুকালে তিনি স্ত্রী মুকাররমা মরিয়ম সিদ্দিকা সাহেবাছাড়াও চার সন্তান যথাক্রমে জায়েব, আয়েশা, খওলা ফাতিমা এবং খায়শারা নাসিরাকে রেখে গেছেন। এরা সবাই অনূর্ধ্ব ১৫ তথা সর্বজ্যেষ্ঠ সন্তানের বয়স ১৫ বছর আর সর্বকনিষ্ঠ সন্তানের বয়স ৮ মাস এবং এরা সবাই ওয়াকফে নও স্কীমে অন্তর্ভুক্ত।

আমাদের স্থানীয় মুবাল্লিগ মে'রাজ দ্বীন সাহেব বর্ণনা করেন যে, জুলফিকার সাহেব খুবই সফল এবং পরিশ্রমী মুবাল্লিগ ছিলেন। যেখানেই তার পদায়ন হতো, সেখানেই তিনি তরবিয়ত, যোগাযোগ স্থাপন এবং তবলীগের কার্যক্রম অতি উত্তমভাবে সম্পাদন করতেন। মরহুম প্রত্যেকের সাথে নশ্রভাবে কথা বলতেন আর সবার সাথে বন্ধুত্বপূর্ণ সম্পর্ক রাখতেন। যখনি (কারো সাথে) সাক্ষাৎ হতো, সদা হাস্যবদনে সাক্ষাৎ করতেন। কখনো কোন চাহিদা বা দাবিদাওয়া পেশ করতেন না, বরং সর্বদা দোয়ার প্রতি জোর দিতেন। আর এ বৈশিষ্ট্যই একজন ওয়াকফে জিন্দেগীর মূল চেতনা ও প্রেরণা, যা তার মাঝে থাকা উচিত। অর্থাৎ যদি কিছু চাইতে হয় তাহলে সর্বদা খোদার কাছে চাওয়া উচিত আর কখনো কোন চাহিদা বা দাবিদাওয়া পেশ করা উচিত নয়। এটি অতীব গুরুত্বপূর্ণ একটি বৈশিষ্ট্য, প্রত্যেক ওয়াকফে জিন্দেগীর উচিত এই বৈশিষ্ট্যকে ধারণ করা।

আল্লাহ তা'লার কৃপায় তিনি সেসব মুবাল্লিগদের অন্তর্ভুক্ত ছিলেন যাদের ব্যাপকহারে বয়আত করানোর সৌভাগ্য হয়েছে আর একারণে ২০১৮ সনে জামা'তী ব্যবস্থাপনার অধীনে তার এখানে জলসায় আসারও সুযোগ হয়েছে। কর্মক্ষেত্রে তিনি সর্বদা সুপরিপক্বিতভাবে কাজ করতেন যার ফলে

তিনি সর্বত্র সাফল্য পেতেন। একইভাবে আমাদের মুরব্বী সিলসিলা আসেফ মুঈন সাহেব তার গুণাবলীর কথা উল্লেখ করতে গিয়ে লিখেন, তিনি অনেক গুণের অধিকারী ছিলেন। তিনি অত্যন্ত পুণ্যবান, নিষ্ঠাবান ও অনুগত একজন মানুষ ছিলেন। দীর্ঘ দিন যাবৎ অসুস্থ ছিলেন, অসুস্থাবস্থায়ও জামা'তের কাজকে প্রাধান্য দিতেন। তিনি বলেন, মরহুম যখন রিয়াও অঞ্চলের আঞ্চলিক মুবাল্লেগ হিসেবে কাজ করছিলেন তখন তার অধীনে আমার (আসিফ সাহেবের) কাজ করার সুযোগ হয়েছে। তিনি উত্তম নেতাসুলভ দক্ষতার ভিত্তিতে কাজ করাতেন। সরকার ও প্রাদেশিক বিভিন্ন সংগঠনের সাথে তার ভালো যোগাযোগ ছিল, এর ফলে বেশ কয়েকবার তিনি বিভিন্ন বিশ্ববিদ্যালয়ে বক্তব্য দেয়ারও সুযোগ পান। এছাড়া প্রদেশে লস্ট জেনারেশন এর সাথে যোগাযোগ স্থাপন করে তাদেরকে জামা'ত সম্পর্কে অবগত করেছেন এবং গোটা প্রদেশে এ ধরনের অভিযান অব্যাহত রাখেন। একটি স্থানীয় জামা'ত স্যাংগিগী-কে প্রায় ২০ বছর পর পুনঃপ্রতিষ্ঠার সৌভাগ্য তিনি লাভ করেন। যাদেরকে লস্ট জেনারেশন বলা হয় তাদের সাথে যোগাযোগ করার জন্য তাকে নৌকা যোগে ছোট ছোট দ্বীপে যেতে হতো আর এক দ্বীপ থেকে অপর দ্বীপে যেতে দেড়-দুই ঘন্টার সফর করতে হতো। তিনি অসুস্থ হওয়া সত্ত্বেও সাহস করতেন এবং বলতেন, যতক্ষণ আমার মাঝে সেবা করার শক্তি আছে, শেষ নিঃশ্বাস পর্যন্ত কাজ করে যাব। এসব সফরের কল্যাণে চারটি পরিবার জামাতভুক্ত হয়।

ডায়লাসিসের জন্য তিনি হাসপাতালে চিকিৎসাধীন ছিলেন। এই অবস্থায়ও তিনি একটি স্থানীয় সভায় অংশগ্রহণ করেন। সেখানকার এক খাদেম তাকে জিজ্ঞেস করে, আপনি কেন এত কষ্ট করলেন? উত্তরে তিনি তাকে বলেন, যতদিন আমার দেহে প্রাণ আছে আমি জামা'তের সকল অনুষ্ঠানে অংশগ্রহণের চেষ্টা করে যাব। যদিও আমি অসুস্থ, কিন্তু আমার বাসনা হলো, সর্বদা ধর্মসেবায় লেগে থাকা। এই হলো একজন ওয়াকফে জিন্দেগীর চেতনা ও প্রেরণা, যা তার মাঝে থাকা উচিত। কিছু লোক সামান্য সামান্য বিষয়ে যেভাবে উৎকণ্ঠিত ও বিচলিত হয়ে পড়ে- তা হওয়া উচিত নয়।

অনুরূপভাবে সেখানকার মুরব্বী মুজাফফর আহমদ সাহেব লিখেন, তার সাথে আমার জামেয়াতে পড়ালেখা করার সুযোগ হয়েছে এবং কাদিয়ানে শেষবারের মতো তার সাথে আমার সাক্ষাৎ হয়। অর্থাৎ সম্ভবত এ বছর তার সাথে তিনি কাদিয়ান গিয়েছিলেন। কাদিয়ান যাওয়ার পূর্বে মরহুম যখন গুরুতর অসুস্থ ছিলেন তখন এ দোয়া করতেন যে, হে আল্লাহ! এতটুকু আয়ু দাও যাতে আমি কাদিয়ান যেতে পারি। তিনি বলতেন, ওমরাহ করার সৌভাগ্য আল্লাহ তা'লা দিয়েছেন আর যুগ-খলীফার সাথে সাক্ষাতেরও সুযোগ হয়েছে, এখন শুধু কাদিয়ান দেখার বাসনা অপূর্ণ রয়ে গেছে। অতএব আল্লাহ তা'লা স্বীয় কৃপায় তার এ আকাঙ্ক্ষাও পূর্ণ করেছেন আর তাঁর কাদিয়ান দেখার সৌভাগ্য লাভ হয়েছে। এ বছর যদিও জলসা অনুষ্ঠিত হয় নি, কিন্তু (জলসা সম্পর্কিত) নিষেধাজ্ঞা পৌঁছার পূর্বেই তারা সেখানে পৌঁছে গিয়েছিলেন। এভাবে তার সেখানে স্বাধীনভাবে ইবাদত করারও সুযোগ হয়েছে। এই মুরব্বী সাহেব আরো লিখেন, কাদিয়ানে চরমভাবাপন্ন আবহাওয়া এবং প্রচণ্ড শীতের কারণে তার স্বাস্থ্যের বেশ অবনতি ঘটে, যার ফলে তাকে শীঘ্র ইন্দোনেশিয়া ফিরে যেতে হয়। কিন্তু এই ভঙ্গুর পরিস্থিতিতেও তার পুণ্যবাসনা পূর্ণ হয় আর তিনি বায়তুদ্ দোয়া এবং মসজিদে মোবারকে নামায পড়ার ও দোয়া করার সৌভাগ্য লাভ করেন। এরপর তিনি বলেন, আমি তাকে হুইল চেয়ারে বসিয়ে বেহেশতি মাকবেরায় যিয়ারতের জন্য নিয়ে গিয়েছি, তিনি সেখানে দোয়াও করেছেন। তিনি খুবই পরিশ্রমী মুবাল্লেগ ছিলেন। রোগের ভয়াবহতা সত্ত্বেও তিনি কখনো মনোবল হারান নি আর তার ওপর জামা'তের যে কাজই ন্যস্ত হতো তিনি তা সুচারুরূপে সম্পাদন করতেন। তেমনিভাবে অপর এক মুরব্বী সাজেদ সাহেব লিখেন, জ্যেষ্ঠ মুরব্বী হওয়া সত্ত্বেও তবলীগি বিষয়াদিতে কনিষ্ঠদের মতামত নিতে কখনো দ্বিধা করতেন না। খুবই বিনয়ী ও নস্র স্বভাবের মানুষ ছিলেন। মরহুম খুবই দৃঢ়সংকল্পের অধিকারী ছিলেন। গতবছর তিনি অসুস্থ হয়ে পড়েন কিন্তু কিছুটা সুস্থ হতেই দীর্ঘ পথ পাড়ি দিয়ে খোন্দামুল আহমদীয়ার ইজতেমায় যোগদানের জন্য পৌঁছে যান।

বাসোকী সাহেব লিখেন, মিশনহাউজ অফিসে যখন আমার পদায়ন হয়

(অর্থাৎ শেষ তিন বছর তিনি মুবাল্লেগ ইনচার্জ ছিলেন) তখন তবলীগী অনুষ্ঠা নাতির সুবাদে মাঠপর্যায়ে কর্মরত মুবাল্লেগদের সাথে যোগাযোগ হয়। তখন আমি লক্ষ্য করলাম, তবলীগী প্রোগ্রাম প্রস্তুত বা প্রণয়নে মরহুম চমৎকারভাবে কাজ করতেন। তবলীগী অনুষ্ঠানগুলোকে সফল করার জন্য দাঈয়ানে ইলাল্লাহ এবং স্থানীয় মুবাল্লেগদের ব্যবস্থাপনা খুবই সুচারুরূপে ও দক্ষতার সাথে পরিচালনা করতেন। আমাকে সর্বদা বলতেন, বয়আতের সংখ্যা হালনাগাদ বা আপডেট করতে থাকা উচিত যেন রিজিয়নে কর্মরত দাঈয়ানে ইলাল্লাহদের উৎসাহ-উদ্দীপনা বৃদ্ধি পেতে থাকে। এটিই নিয়ম, অর্থাৎ বয়আতের সংখ্যার প্রতি দৃষ্টি রাখা উচিত, দাঈয়ানে ইলাল্লাহকে অবগত রাখা উচিত আর তাদের কাছ থেকে খবরাখবরও নেয়া উচিত। এতে করে দাঈয়ানে ইলাল্লাহরা সক্রিয় থাকে এবং নও মোবাইনদের ব্যবস্থাপনার অন্তর্ভুক্ত করা সম্ভব হয়।

মুরব্বী সারমাদ সাহেব বলেন, মরহুম তবলীগি কার্যক্রম সুচারুরূপে সম্পাদনের একটি বিশেষ প্রেরণা ও উচ্ছ্বাস রাখতেন। আমরা যখন উত্তর সুমাত্রার বন্দুপানে থেকে শুরু করে প্রাদেশিক সীমান্তবর্তী অঞ্চল সোসা পর্যন্ত তবলীগের নতুন পথ উন্মোচনের পরিকল্পনা করছিলাম তখন তিনি খুব দৃঢ় প্রত্যয় নিয়ে আশায় বুক বেঁধে বিভিন্ন প্রোগ্রাম ও পরিকল্পনা হাতে নেন এবং আল্লাহর ফয়লে দীর্ঘদিন পর্যন্ত সেই অভিযান অব্যাহত থাকে। পরবর্তীতে তহবিল-স্বল্পতার কারণে এটি বাধাগ্রস্ত হয়, কিন্তু তার এই অভিযানের সুফল প্রকাশ পায় এবং অধিকাংশ নও মোবাইন উক্ত অঞ্চল থেকেই আসে। তিনি সবসময় বলতেন, কখনো নিরাশ হবে না, কেননা আমাদের কাজ মূলত তবলীগ করা ও বীজ বপন করা। হতে পারে ফসল কাটা ও ফল ঘরে তোলার সৌভাগ্য অন্য কারো হবে। যাহোক খুবই দৃঢ়সংকল্প এবং বিশ্বস্ততার সাথে ওয়াকফের দায়িত্ব পালনকারী ছিলেন।

আল্লাহ তা'লা তাঁর মর্যাদা উন্নীত করুন। তিনি তার বয়আতের অঙ্গীকার রক্ষা করেছেন এবং ওয়াকফের অঙ্গীকারও খুবই সুন্দরভাবে পালন করেছেন। আল্লাহ তা'লা ক্রমাগতভাবে তার মর্যাদা উন্নীত করুন। মরহুমের স্ত্রী এবং সন্তানসন্ততিকে আল্লাহ আপন সুরক্ষার চাদরে আবৃত রাখুন এবং তিনি স্বয়ং তাদের অভিভাবক হোন।

দ্বিতীয় যে মরহুমের আমি স্মৃতিচারণ করবো তিনি হলেন, ইসলামাবাদের ডাক্তার পীর মুহাম্মদ নকীউদ্দীন সাহেব। তিনি গত ১৮ এপ্রিল ইন্তেকাল করেছেন, ইনালিল্লাহি ওয়া ইন্না ইলাইহি রাজেউন। মৃত্যুর সপ্তাহ-দশদিন পূর্বে সাম্প্রতিককালে ছড়িয়ে পড়া করোনা ভাইরাসের বিভিন্ন লক্ষণ তার মাঝে প্রকাশ পেতে শুরু করে। তাকে হাসপাতালে ভর্তি করা হয়। প্রথমদিকে তার স্বাস্থ্যের উন্নতি ঘটছিল, কিন্তু গত ১৮ এপ্রিল স্বাস্থ্যের অবনতি ঘটে এবং তাকে আইসিইউতে স্থানান্তর করা হয়, যেখানে প্রায় সন্ধ্যার দিকে তিনি ইহখাম ত্যাগ করেন। মৃত্যুকালে মরহুম স্ত্রী ছাড়াও এক পুত্র ও চার কন্যা রেখে গেছেন, তারা সকলেই বিবাহিত এবং নিজ নিজ সংসারে সুখে আছেন। মরহুম পীর মুহাম্মদ নকীউদ্দীন সাহেবের পিতা ও মাতা উভয়ের পরিবারের সকলেই হযরত মসীহ মওউদ (আ.)-এর সাহাবীদের বংশধর ছিলেন। তার বংশবৃক্ষ হযরত সূফী আহমদ জান সাহেব পর্যন্ত পৌঁছে। তার দাদা হযরত পীর মাযহারুল হক সাহেব এবং নানা হযরত মাস্টার নযীর হোসেন সাহেব- উভয়েই হযরত মসীহ মওউদ (আ.)-এর বিশিষ্ট সাহাবী হবার সম্মান লাভ করেছেন। হযরত পীর মাযহারুল হক সাহেব কাদিয়ানের মাদ্রাসা আহমদীয়ায় হযরত মুসলেহ মওউদ (রা.)-এর সহপাঠী হওয়ারও সম্মান রাখতেন। তারা অর্থাৎ পীর মাযহারুল হক সাহেবেরা শৈশবে লুধিয়ানা থেকে হিজরত করে কাদিয়ানে আসেন এবং প্রায় ছয় মাস পর্যন্ত প্রায় সময় হযরত আকদাস মসীহ মওউদ (আ.)-এর বাড়িতে থাকার সৌভাগ্য লাভ করেন। শ্রদ্ধেয় ডাক্তার সাহেবের মাতা হাকীম মুহাম্মদ হোসেন 'মরহমে ঈসা' সাহেবের পৌত্রি ছিলেন। ১৯৪৭ সালে ভারত-বিভাগের সময় ডাক্তার পীর মুহাম্মদ নকীউদ্দীন সাহেবের বয়স ছিল প্রায় এক বছর। অর্থাৎ ১৯৪৬ সালে তার জন্ম হয়েছে, এই হিসেবে তার বয়স হয়েছিল প্রায় ৭৪ বছর; তিনি পরিবারের সাথে কাদিয়ান থেকে হিজরত করে প্রথমে লাহোরে আসেন, পরবর্তীতে ভেহাড়ি জেলার মেলসিতে বসবাস শুরু করেন। ১৯৭০ সালে নিশতার মেডিকেল কলেজ থেকে এমবিবিএস পাস করেন। ১৯৭৫/৭৬ সনে ইসলামাবাদে স্থানান্তরিত হয়ে যান। পরবর্তীতে এখানে সরকারি

পলিক্লিনিক হাসপাতালে চাকরি পান। এখানে দীর্ঘদিন সেবা প্রদানের পর চাকরি ছেড়ে দিয়ে ইরানে চলে যান, সেখানে দু'তিন বছর কাজ করেন। এরপর পাকিস্তান ফিরে আসেন; এখানে ইসলামাবাদে নিজের ক্লিনিক প্রতিষ্ঠা করেন এবং বিগত পঁচিশ-ত্রিশ বছর ধরে নিজের ক্লিনিক পরিচালনা করে আসছিলেন। আল্লাহর কৃপায় তা অত্যন্ত সফল ছিল, দরিদ্রদের অনেক সেবা করতেন।

ইসলামাবাদ জামাতের আমীর ডাক্তার আব্দুল বারী সাহেব লিখেন, ডাক্তার পীর মুহাম্মদ নকীউদ্দীন সাহেব বিগত বারো বছরের অধিক কাল ধরে আহমদীয়া জামাত, ইসলামাবাদে কাযী-র দায়িত্ব পালন করছিলেন। তিনি সবসময় কুরআন ও সুননের আলোকে সিদ্ধান্ত প্রদান করতেন, যা বিবদমান উভয় পক্ষের জন্য পরম স্বস্তির কারণ হতো। অত্যন্ত সদাচারী, মিশুক, স্নেহবৎসল, গরীবের বন্ধু এবং সর্বজনপ্রিয় ব্যক্তিত্বের অধিকারী ছিলেন; সবার সাথে হাসিমুখে কথা বলতেন। পেশাগতভাবে যেহেতু ডাক্তার ছিলেন, তাই দিন-রাত খোদার সৃষ্টির সেবা তথা মানবসেবায় অগ্রগামী থাকতেন। জামাতের দরিদ্র ও অসুস্থ রোগীদের জন্য তার ক্লিনিকের দ্বার সবসময় খোলা থাকত, আর তিনি অধিকাংশ সময়ই বিনামূল্যে সবাইকে সেবা প্রদান করতেন। কেবল জামাতের-ই নয়, অ-আহমদীদের জন্যও তার মন ও ক্লিনিকের দুয়ার সদা-উন্মুক্ত ছিল; এক মানবহিতৈষী ব্যক্তি ছিলেন তিনি। তার বন্ধু ত্বের গণ্ডি অনেক বিস্তৃত ছিল এবং তাতে বেশ বড় সংখ্যক অ-আহমদীরাও অন্তর্ভুক্ত ছিলেন। আল্লাহ তা'লা তাকে বাকপটুতা দান করেছিলেন, অ-আহমদী বন্ধুদেরকে তবলীগ করার কোন সুযোগ হাতছাড়া করতেন না; আল্লাহর কৃপায় এরূপ (অর্থাৎ প্রতিকূল) পরিস্থিতি সত্ত্বেও তবলীগ করতেন।

ডাক্তার সাহেব তাকে বলেন, যখন ১৯৭০ সালে আমি এমবিবিএস পরীক্ষা পাস করি, তখন আমি রাবওয়ান আমার দাদা হযরত পীর মাহহারুল হক সাহেবের কাছে যাই এবং তাকে এই সুসংবাদ দিই যে, আমি আমার বংশের প্রথম যুবক, যে ডাক্তারী পাশ করেছে। আমার দাদা খুবই আনন্দিত হন এবং অন্যান্য উপদেশ প্রদানের পাশাপাশি এ উপদেশও দেন যে, নিজের রোগীদের ঔষধ দেয়ার পাশাপাশি তাদের জন্য দোয়াও করবে, কেননা হযরত মসীহ মওউদ (আ.) বলতেন, যে চিকিৎসক তার রোগীদের জন্য দোয়া করে না আর কেবল নিজের চিকিৎসার ওপরই নির্ভর করে, সে প্রকৃতপক্ষে শিরক করে। ডাক্তার নকীউদ্দীন সাহেব বলতেন, ডাক্তারি পেশায় আমার পঞ্চাশ বছর হয়ে গেল, আর এই পঞ্চাশ বছর যাবত আমি আমার দাদার নসীহত মেনে রোগীদের স্বল্পমূল্যে চিকিৎসা সেবা দেয়ার পাশাপাশি তাদের সাথে উত্তম ব্যবহার করি, বরং প্রতিদিন বিনা ব্যতিক্রমে দুই রাকাত নফল নামায পড়ে তাদের জন্য দোয়াও করে থাকি। এই রীতিই আমাদের সব ডাক্তারের অবলম্বন করা উচিত। শুধু পেশাগত দক্ষতা এবং ঔষধের ওপরই নির্ভর করবেন না, শুধু ঔষধের ওপর যেন বিশ্বাস না থাকে, বরং চিকিৎসার পাশাপাশি যেখানে রোগীদের সাথে উত্তম ব্যবহার করবেন সেখানে তাদের জন্য দোয়া করাও নিশ্চিত করুন। আর যদি নফল নামায পড়েন তবে তা খুবই উত্তম।

তার স্ত্রী উয়মা নকী সাহেবা বলেন, আমার স্বামী খুবই নিষ্ঠাবান এবং নিবেদিত প্রাণ আহমদী ছিলেন। ধর্মের তবলীগ করার গভীর উন্মাদনা ছিল তাঁর মাঝে। তিনি অনেক বয়সাতও করিয়েছেন এবং অনেক মানুষকে আহমদীয়াতের সত্যতা মানিয়েছেন। ভয় কিংবা অন্য কোন কারণে অনেকে আহমদীয়াত গ্রহণ করে না, কিন্তু তিনি কমপক্ষে তাদেরকে আহমদীয়াতের সত্যতা মানতে বাধ্য করেছেন এবং তাদেরকে নির্বাক করে দিয়েছেন। এরপর অবশ্য তাদের সাথে সুসম্পর্কও প্রতিষ্ঠিত হয়েছে। তার স্ত্রীও একই কথা লিখেন যে, রোগীদের জন্য তিনি সবসময় দুই রাকাত নফল নামায পড়তেন। আরো লিখেন যে, রোগীদের জন্য তার ভালোবাসার কারণে তিনি এই মহামারির সময়ও ক্লিনিকে যেতেন যে, কোথাও আমার রোগীরা দুশ্চিন্তাগ্রস্ত হয়ে পড়ে। জ্বর আসার পরই কেবল ছুটি করেছেন। তিনি আরো লিখেন, রোগীদের সঠিকভাবে চিকিৎসা প্রদান, তাদের খেয়াল রাখা এবং তাদের জন্য দোয়া করা এসব বৈশিষ্ট্যের পাশাপাশি তিনি একজন অনুগত ছেলে, আদর্শ স্বামী, পরম স্নেহশীল পিতা এবং ভাইবোন ও বন্ধুদের প্রতি যত্নশীল একজন

মানবহিতৈষী ব্যক্তিত্ব ছিলেন। জীবন্ত খোদার সাথে তার গভীর সম্পর্ক ছিল। দোয়ায় অনেক বেশি অভ্যস্ত ছিলেন আর চিরঞ্জীব ও চিরস্থায়ী খোদা তার দোয়া শুনতেন। তার স্ত্রী বলেন, আমাদের এক মেয়ের ঘরে বিয়ের কয়েক বছর পরও কোন সন্তান হয় নি, তিনি তার জন্য অনেক দোয়া করতেন। একবার আমরা তার বাড়িতে ছিলাম। ভোরবেলা তাহাজ্জুদের সময় কিংবা নামাযের সময় তিনি ওয়াশরুফ থেকে বেরিয়ে একটু ঝুঁকলেন। জিজ্ঞেস করলে তিনি বলেন, এখানে বিছানার পাশে একটি শিশু ছিল অর্থাৎ দিব্যদর্শনে তিনি এটি দেখেন। এ সম্পর্কে আরো একটি রেওয়াজে রয়েছে যে, তিনি দিব্যদর্শনে বিছানার উপর একটি শিশু দেখতে পান এবং বলেন, আমার মনে হলো, শিশুটির পড়ে যাওয়ার উপক্রম হচ্ছে তাই আমি তাকে ধরার জন্য ঝুঁকলাম। এই ঘটনার কিছুকাল পরেই আল্লাহ তা'লা কৃপা করেন এবং তার এই মেয়ের ঘরে এক পুত্র সন্তান দান করেন অথচ ডাক্তাররা এ ব্যাপারে খুব বেশি আশাবাদী ছিল না। আল্লাহ তা'লা এই ছেলেকে পুণ্যবান করুন এবং ধর্মের সেবা করার তৌফীক দান করুন।

তার ভাগ্নে ও জামাতা আরশাদ এজায সাহেব বলেন, মরহুম সম্পর্কের দিক থেকে আমার সবচেয়ে বড় মামা ছিলেন। এ কারণে যখন থেকে বুঝতে শিখেছি, তার সম্পর্কে অনেক কিছু শুনেছি এবং দেখেছি। তিনি অনেক দোয়া করতেন, গরীবদের প্রতি সহানুভূতিশীল, নিঃস্বার্থ, খুবই সূক্ষ্ম ও সুন্দর চিন্তাধারার মানুষ এবং জীবনের কঠিন সময়েও তিনি আল্লাহ ও তাঁর রসূল (সা.)-এর নির্দেশাবলী কে সামনে রাখতেন। যদি কখনো পারবারিক, জামাতী কিংবা জাগতিক কোন বিষয়ে পরামর্শ নেবার প্রয়োজন হতো তখন আমার মাথায় নির্দিষ্ট সর্বপ্রথম এটি আসতো যে, মামার কাছে গিয়ে পরামর্শ নেই। তিনি বলেন, মামার অর্থাৎ ডাক্তার সাহেবের আরেকটি দিব্যদর্শন ছিল এম.টি.এ সম্পর্কে যা হয়তো অন্য কারোও জানা থাকবে। সম্ভবত ২০১০ সালের ঘটনা, যখন নিদেনপক্ষে পাকিস্তানে আধুনিক টাচ মোবাইল সচরাচর দেখা যেত না। তিনি বলেন, আমি মামার কাছে বসে তার কথা শুনছিলাম। তিনি বলেন, কিছুদিন পূর্বে আমি (স্বপ্নে) দেখলাম, আযান সদৃশ কোন ঘোষণা হলো আর কিছু লোক তাদের পকেট থেকে কিছু বের করে নিজেদের কানে লাগাচ্ছে। ভালোভাবে লক্ষ্য করার পর জানা গেল যে, খলীফাতুল মসীহর খুতবার সময় হয়েছে এবং সবাই লাইভ খুতবা শুনছে। এটি আজ আমরা প্রতি সপ্তাহেই পূর্ণ হতে দেখি।

তিনি আরো লিখেন, হযরত সুফি আহমদ জান সাহেবের বংশের সাথে সম্পর্কে তিনি শুধু নিজের জন্য সম্মানের বিষয় বলে মনে করতেন না, বরং বংশের বাকী লোকদেরকে বলতেন যে, আল্লাহ তা'লার সাথেও ব্যক্তিগত সম্পর্ক থাকতে হবে। শুধু কোন পুণ্যবান মানুষের বংশের সাথে সম্পর্ক থাকা কোন শ্রেষ্ঠত্বের বিষয় নয়; খোদার সাথে তোমাদের ব্যক্তিগত সম্পর্ক থাকাই হলো আসল বিষয়। দা'ওয়াত ইলাল্লাহ বা তবলীগের গভীর আগ্রহ রাখতেন বরং উন্মাদনা ছিল; ইনিও একই কথা লিখেছেন। আরো অনেকেই লিখেছেন, কিন্তু সবকিছু বর্ণনা করা সম্ভব নয়। এটিই লিখেছেন যে, তিনি খুব সুন্দরভাবে কুরআনের দলীল-প্রমাণ মূলে দা'ওয়াত ইলাল্লাহ বা তবলীগ করতেন।

সালানা জলসার সময় বিশেষভাবে অ-আহমদী বন্ধুদের ঘরে আমন্ত্রণ জানাতেন এবং সুস্বাদু খাবারের মাধ্যমে তাদের আপ্যায়ন করতেন। তাদেরকে জলসা শুনাতেন, এভাবে তবলীগের পথও খুলে যেত। তিনি বলেন, করোনা মহামারি দেখা দেয়ার পরও মামা ক্লিনিকে যাওয়া বন্ধ করেননি। আমি কয়েকবার তাকে ফোনে বলেছি এবং বুঝানোর চেষ্টা করেছি যেন তিনি (ক্লিনিকে) না যান। তখন তিনি এটিই বলতেন যে, ডাক্তার ঘরে বসে গেলে রোগী কী করবে? এর পাশাপাশি বিভিন্ন যুক্তি দিতেন, যেকারণে আমি নিরুত্তর হয়ে যেতাম। চরম অসুস্থ অবস্থায়ও ক্লিনিকে যেতেন। সর্বদা এটিই বলতেন যে, আমরা সেবার জন্য এখানে আসি, এখানে একটি দায়িত্ব পালন করছি। শুধু অর্থ উপার্জন করা ক্লিনিকের উদ্দেশ্য নয়।

তার মেয়ে আয়েশা নূরুদ্দীন বলেন, আমার পিতা একজন অত্যন্ত স্নেহশীল, দয়ালু ও দোয়ায় অভ্যস্ত পিতা ছিলেন। প্রতিটি বিষয়ে সর্বদা দোয়া করা ও আল্লাহ তা'লার সাথে সম্পর্ক স্থাপনের উপদেশ দিতে থাকতেন। তিনি বলেন,

যে কোন বিষয়ে তাকে দোয়ার জন্য বললে তিনি এটিই বলতেন যে, নিজেও দোয়া কর আর আমিও দোয়া করব। এরপর আল্লাহ তা'লার পক্ষ থেকে দিকনির্দেশনা নি যে আমাদেরকে বলতেন যে, আমি এরূপ স্বপ্ন দেখেছি বা আল্লাহ তা'লা এভাবে বলেছেন। পেশাগতভাবে হাজার হাজার লোকের চিকিৎসা করতেন, হাজার হাজার লোককে বিনামূল্যে চিকিৎসা সেবা দিতেন ও তাদের দেখাশোনাও করতেন। রোগীদের কাছ থেকে এত কম ফিস নিতেন যে, তার অধিকাংশ রোগী গরীবরাই ছিল। তিনি আরো লিখেন, আমার পিতা একজন জীবন্ত কুরআন ছিলেন। যে কোন বিষয়ে কুরআনের পথনির্দেশনা নেওয়ার ক্ষেত্রে প্রথমে কুরআনের আয়াত মুখস্ত পাঠ করতেন, এরপর অনুবাদ বলে বিষয়টি বিস্তারিত বুঝাতেন। খিলাফতের সাথে এত গভীর ভালোবাসা ছিল যে, এম টি এ-তে এক ঘণ্টার খুতবা সম্প্রচার আরম্ভ হতেই তিনি সাথে সাথে ঘরে ডিশ লাগানোর ব্যবস্থা করেন যেন এম টি এ দেখার জন্য লোকেরা আমাদের ঘরে আসে। খিলাফতের প্রতি এ ভালোবাসার কারণে সালানা জলসার সমাপ্তি ভাষণ বেশ ক'জন অ-আহমদীকে ডেকে শুনাতেন। তাদেরকে বয়াআত অনুষ্ঠানের পুরো কার্যক্রম দেখাতেন। জলসার কার্যক্রম দেখানোর পাশাপাশি খাবারেরও ভালো ব্যবস্থা করতেন আর বলতেন এরা হযরত মসীহ মওউদ (আ.)-এর মেহমান।

তার কন্যা ওয়ারদাহ বলেন, শৈশব থেকেই আমাদেরকে নামায পড়া, কুরআন পাঠ, রোযা রাখা, সময়মতো চাঁদা পরিশোধ করা ও সদকা-খয়রাত করায় অভ্যস্ত করেন। আমাদের ভাই বোনদের বিয়ে দেয়ার সময় শুধুমাত্র ধর্ম দেখেছেন। কখনো পার্থিব বিষয়াদির প্রতি জ্রফেপ করেন নি। আমাদেরকে শৈশব থেকেই এটি শিখিয়েছেন যে, সব বাসনা তাৎক্ষণিকভাবে পূর্ণ হয় না। এজন্য সর্বদা ধৈর্য্য অবলম্বন ও দোয়া করতে হয়।

তার জামাতা আব্দুল কুদ্দুস সাহেব বলেন, এই অধমের সাথে শিশুরের সম্পর্ক ছিল পিতাপুত্রের মতো। তিনি বলেন, তার কাছ থেকে নতুন কোন কথা, কোন আয়াতের ব্যাখ্যা অথবা কোন বিতর্কিত বিষয়ে নতুন আঙ্গিকে কিছু শেখার সুযোগ হবে, এজন্য আমি সবসময় তার সাথে সাক্ষাতের জন্য উৎসুক হয়ে থাকতাম। তিনি বলেন, আমার বিয়ের পরে প্রথম প্রথম শিশুরালয়ে যেতে আমি স্বাচ্ছন্দবোধ করতাম না; তিনি এমনভাবে আপন করে নিয়েছেন যে, দ্বিধাদ্বন্দ্ব দূর হয়ে যায় এরপর তিনি লিখেন, কোন জাগতিক বিষয়, রাজনীতি, ফ্যাশন এবং যুগের স্রোতে তার কোন আগ্রহ ছিল না। ইবাদত, কুরআন, ধর্মীয় জ্ঞান এবং নৈতিক ও চারিত্রিক বিষয়াবলী তার একান্ত পছন্দনীয় বিষয় ছিল। বিদআতের বিরুদ্ধে এমন এক পাহাড় ছিলেন যাকে কেউ সরাতে পারতো না। তিনি বিয়ে ইত্যাদির সময় কুপ্রথাকে কঠোরভাবে দমন করেছেন। মেয়েরা এমন কোন গান গাইলে যাতে শিরকের চিহ্নমাত্র থাকত তিনি তৎক্ষণাত্বাধা দিতেন, বরং অত্যন্ত কঠোরভাবে থামাতেন।

একইভাবে তার মেয়ে কুররাতুল আয়েন হাদিয়া লিখেন, তিনি আমাদের নসীহত করে বলেছেন যে, কারো বিরুদ্ধে কখনো মনে কথা পুষে রাখবে না। নিজের শিশুরবাড়ির লোকদেরকে আপন মনে করবে; কাউকে নিজের কথা বা কর্ম দ্বারা কষ্ট দিবে না। এরপর তিনি নিজের মেয়েকে এ কথাও বলেছেন যে, কোন ভালো মানুষের সাথে ভালো আচরণ করা কোন বড় বিষয় নয়। কাজের কথা হলো, খারাপ মানুষের সাথে ভালোব্যবহার করা। এটিই ইসলামের শিক্ষা। বর্তমান যুগে এ সম্পর্কেই হযরত মসীহ মওউদ (আ.) আমাদেরকে বলেছেন যে, এটি সেই জিনিস, এটিই সেই উন্নত নৈতিক চরিত্র যা অন্যদেরকে তোমাদের প্রতি আকৃষ্ট করবে এবং তোমাদের দিকে টেনে আনবে। এরপর তিনি বলেন, বিশৃঙ্খলা হত্যার চেয়েও বড় পাপ, তাই বিশৃঙ্খলা রোধ করতে সত্যবাদী হয়েও মিথ্যাবাদীর ন্যায় বিনয় অবলম্বন কর। এ মহান উপদেশই হযরত মসীহ মওউদ (আ.) আমাদের দিয়েছেন। পিতামাতারা যদি এই নসীহতই সন্তানদেরকে করতে থাকেন তাহলে একটি সুন্দর সমাজ গড়ে উঠতে পারে।

তার পুত্র পীর মুহিউদ্দীন সাহেব বলেন, আমি স্বপ্নে দেখি যে, হযরত খলীফাতুল মসীহ রাবে (রাহে.) আমাদের ঘরের লাউজে বসে দরস দিচ্ছেন, আমিও সেখানে বসে আছি, আমাকে উদ্দেশ্য করে তিনি বলেন, এটা

ঘর নয় বরং 'দ্বার' (বহু কক্ষবিশিষ্ট বড় ঘর)। এ থেকে তোমরা কল্যাণ লাভ করে থাক। এ 'দ্বার' কখনো পরিত্যাগ করো না। আমাকে উদ্দেশ্য করে তিনি বলেন, তোমার পিতা ওলীআল্লাহ। পুনরায় বলেন নিশ্চিত জেনে রাখ, তোমার পিতা ওলীআল্লাহ।

দরিদ্রদের প্রতি তিনি খুবই সহানুভূতিশীল ছিলেন। অনেক পরিবারের মাসিক রেশন এবং শিশুদের পড়াশোনা, ঔষধ এবং চিকিৎসার দায়িত্ব নিয়ে রেখেছিলেন। প্রতিদিন পঞ্চাশ শতাংশের বেশি রোগীকে বিনামূল্যে দেখতেন।

একইভাবে তার জামাতা আব্দুস সামাদ সাহেব বর্ণনা করেন, কুরআন করীমের প্রতি সীমাহীন ভালোবাসা ছিল। যখন কোন বিষয়ে কথা বলতে হতো অবশ্যই কুরআনের আয়াত পাঠ করে এরপর তার অনুবাদ উপস্থাপন করতেন। অ-আহমদীদের সাথে কথোপকথনের সময় যদি কেউ বলত যে, মির্যা গোলাম আহমদের কোন নিদর্শন দেখাও; তখন তিনি বলতেন, আমি নিজেই নিদর্শন। তিনি একজন আদর্শ আহমদী ছিলেন। নিজ জামা'তের কাছে হযরত মসীহ মওউদ (আ.)-এর যে প্রত্যাশা ছিলতিনি তার সঠিক প্রতিচ্ছবি বা সত্যায়নস্থল ছিলেন। তার ব্যক্তিত্বের অনন্য বৈশিষ্ট্য ছিল যে, তার সাথে সাক্ষাৎকারীসবার প্রকৃতিতে পুণ্যের প্রতি আকর্ষণ সৃষ্টি হয়ে যেত। এটাই একজন পুণ্যবান ব্যক্তির বৈশিষ্ট্য হয়ে থাকে যে, তার সান্নিধ্যে যারা বসে তারাও পুণ্যবান হয়ে যায়। আর এটি কোন কথার কথা ছিল না যে 'আমি নিদর্শন'। কিছু অ-আহমদী কখনো কখনো এটিকে ঠাট্টা মনে করে, তিনি বলতেন ঠাট্টা করছি না বরং সত্যিই তা-ই; আর যুক্তি-প্রমাণ দিয়ে অন্যদেরকে মানতে বাধ্য করতেন যে, আহমদী হিসেবে যারা সঠিকভাবে শিক্ষার ওপর প্রতিষ্ঠিত, তারা হযরত মসীহ মওউদ (আ.)-এর সত্যতার এক জীবন্ত নিদর্শন ও মু'জিযা। সুতরাং এটিই সেই মান, যা প্রত্যেক আহমদীর অর্জনের চেষ্টা করা উচিত। পুরোনো নিদর্শন সন্ধান করার পরিবর্তে স্বয়ং এক নিদর্শন হয়ে যাও।

অনুরূপভাবে ইসলামাবাদের নায়েব আমীর আব্দুর রউফ সাহেব বলেন, আমাকে বেশ কয়েক জন বলেছেন যে, আমরা তো অন্য কোন ডাক্তারকে চিনিই না; এখন আমরা কী করব! জামা'তের অনেক এমন দরিদ্র বন্ধু রয়েছে যাদের চিকিৎসা নিয়ে কোন অসুবিধাই হয় নি। তারা নির্দিষ্ট ডাক্তার নকী সাহেবের ক্লিনিকে চলে আসতেন; সেখানেই চিকিৎসা করাতেন। অনেক অ-আহমদী বন্ধুরাও জানিয়েছেন যে, তিনি আমাদের পরিবারের গুরুজন ছিলেন। আমরা তাঁর পরামর্শ ছাড়া কোন কিছুই করতাম না। শুধুমাত্র আহমদীরাই নন বরং অ-আহমদীরাও তাঁর সাথে পরামর্শ করত। অনেক অ-আহমদী পরিবারের পারিবারিক কলহ-বিবাদও ডাক্তার সাহেবই সমাধা করতেন। কেননা যে স্থানে তাদের ক্লিনিকটি অবস্থিত সেখানে প্রায় চল্লিশ বছরের অধিক কাল যাবৎ তার এই ক্লিনিক প্রতিষ্ঠিত। প্রথমে পিতা আসত পরবর্তীতে তাদের সন্তানসন্ততি আসা আরম্ভ করেছে। তিনি অর্থাৎ নায়েব আমীর সাহেব বলেন, ডাক্তার সাহেব অনেকের ঘটনা আমাকে শুনিয়েছেন। কোন কোন অ-আহমদী তাদের সন্তানদের এই উপদেশ দিয়ে মৃত্যু বরণ করত যে, নিজেদের মাঝে কোন মতভেদ কিংবা বিবাদ বা বিতণ্ডা হলে ডাক্তার নকী সাহেবের সাথে অবশ্যই পরামর্শ করবে।

অতঃপর তিনি লিখেন, গত বছর ২০১৯ সালের জুন মাসের শেষ শুক্রবারে জুমু'আর নামাযের পর তিনি আমার দণ্ডরে আসেন। দরজা বন্ধ করে বলেন, তোমাকে একটি কথা শুনতে চাই আর একথা শুধুমাত্র আমার স্ত্রী-ই জানে। চার দিন পূর্বে আমি স্বপ্নে দেখি, রণক্ষেত্রে দাঁড়িয়ে আছি যেখানে সর্বত্র মৃতদেহ বিক্ষিপ্ত পড়ে আছে। আমি এই শহীদদের অন্তর্ভুক্ত হলাম না- একথা চিন্তা করতেই হযরত মসীহ মওউদ (আ.)-এর আওয়াজ কানে আসে যে, যে ব্যক্তি পাঁচটি আঘাত পাবে সে শহীদ। তিনি বলেন, আমি পিছন ফিরে দেখি, হযরত মসীহ মওউদ (আ.) উঁচু একটি স্থানে এক সেনাপতির ন্যায় দাঁড়িয়ে আছেন। ডাক্তার সাহেব বলেন, আমি আমার ক্ষতস্থান গুণতে আরম্ভ করি; আমি লক্ষ্য করলাম, তিনটি যখম বেশ গভীর ছিল আর এক পায়ে সামান্য আঁচড় লেগেছিল। আমি অজস্রধারায় ইন্তেগফার করা আরম্ভ করি। এরপর

আমার ঘুম ভেঙে যায় আর আমি ভাবতে লাগলাম, এর অর্থ কী হতে পারে। তিনি বর্ণনা করেন, এরপর চাঁদার প্রতি গভীরভাবে আমার মনোযোগ আকর্ষণ করা হয় যে, চাঁদার হিসাব করা উচিত। তিনি বলেন, আমি হয়ত আলস্য দেখিয়েছি; পরবর্তী দিন ফজর নামাযের জন্য যখন আমি উঠলাম তখন আমার আক্ষেপ হলো যে, আমি এখনো হিসাব করি নি। তিনি বলেন, সকাল সকাল গিয়েই আমি হিসাব করলাম। দেখলাম যে, আসলেই কিছু টাকা হিসেবের বাইরে ছিল। তিনি বলেন আমি আজ দশ লক্ষ টাকার চেক সেক্রেটারী মাল সাহেবকে হস্তান্তর করেছি আর বলেন, সেদিন থেকে আমি অনেক ইস্তেগফার করছি।

তার ভাগ্নে অ্যাডভোকেট মুজীবুর রহমান সাহেবের পুত্র আযীযুর রহমান সাহেব বর্ণনা করেন, বেশ কয়েকবার তার কাছে তার শৈশবের ও জীবনের ঘটনাবলি শুনেছি। অত্যন্ত প্রতিকূল পরিস্থিতিতে খোদা তা'লার অপার অনুগ্রহে এবং পিতামাতার দোয়ায় ডাক্তার হয়েছেন। তিনি বলতেন, তিনি এমন সময়ও দেখেছেন যখন কাগজ কেনারও টাকা ছিল না। কাজ করার জন্য ব্যবহৃত খাম একত্রিত করে সেগুলো খুলে তাতে নোট নিতেন। এভাবেই নিজের গ্রামে যে স্কুলে পড়তেন সেখানে গণিতের শিক্ষক ছিল না। তাই অন্য গ্রামে গিয়ে সেখানকার শিক্ষকের কাছে গণিত শিখতেন। তারপর নিজ গ্রামে এসে অন্যদের ও সহপাঠীদেরকে পড়াতেন।

তিনি তার নিয়মিত নামায পড়ার বিষয়ে বলেন, ছোটবেলায় একদিন তিনি এবং তাঁর সহোদর বোন খেলতে খেলতে এশার নামায না পড়েই ঘুমিয়ে পড়েন। কিভাবে সময়মতো নামায পড়ায় অভ্যস্ত হয়েছেন সেটা বেশ মজার ঘটনা। মা যখন জিজ্ঞেস করেন, নামায পড়েছ? শৈশব ছিল, তারা ঘুমের ঘোরেই বলে ফেলেন, হ্যাঁ, পড়েছি। তিনি বলেন, মাঝ রাত্তে তার অর্থাৎ ডাক্তার সাহেবের মা এসে জাগান আর তিনি কাঁদছিলেন। তিনি বলেন, তুমি আমাকে নামায সম্পর্কে মিথ্যা বলেছ যে, তুমি নামায পড়েছ। খোদা তা'লা কাশফে জানিয়ে দিয়েছেন যে, তুমি নামায পড় নি। তিনি বলেন, সে দিনের পর থেকে আমি কখনোই নামায ছাড়ি নি। সুতরাং এ ছিল অবস্থা আর আহমদী মায়েদের অবস্থাও এমনই হওয়া উচিত। সন্তানদের সুশিক্ষা ও নামাযের চিন্তা ছিল এবং তাদের জন্য দোয়া করতেন। যখন ব্যাখাতুর হৃদয়ে দোয়া করেন তখন আল্লাহ তা'লা তাকে দৃশ্যও দেখিয়ে দেন যে, আচ্ছা! প্রকৃত চিত্র হলো, তোমার সন্তানেরা নামায পড়ে নি। তাদের উঠাও। এরপর তিনি কাঁদতে কাঁদতে সন্তানদের ঘুম থেকে জাগান। তিনি বলেন, এর এতটাই প্রভাব পড়ে যে, এরপর সারাজীবন আমি কখনোই নামায ছাড়ি নি। অধিকাংশ কথার বরাত কুরআন হতেই টানতেন। তিনি বলতেন, যদি খোদা তা'লার সাথে জীবন্ত সম্পর্ক স্থাপন না হয় তাহলে হযরত মসীহ ম ওউদ (আ.)-এর হাতে বয়'আতের দায়িত্ব পালন হয় না। কেননা, হুযূর (আ.)-এর আবির্ভাবের উদ্দেশ্যই হলো, খোদা তা'লার সাথে বান্দার জীবন্ত সম্পর্ক স্থাপন।

অনুরূপভাবে ডাক্তার আতাউর রহমান সাহেব, তিনিও তার ভাগ্নে, তিনি বলেন, কুরআন করীম নিয়ে গভীর প্রণিধান করতেন এবং কুরআনের গভীর জ্ঞান রাখতেন। অধিকাংশ দীর্ঘ আয়াত তার মুখস্থ ছিল। পাকিস্তানে বিরাজমান বর্তমান পরিস্থিতি সত্ত্বেও কটুর বিরোধীদেরকে নিজের ঘরে দাওয়াত দিয়ে জলসার কার্যক্রম ও খুতবা শোনাতে। তার তবলীগে বেশিরভাগ লোক প্রভাবিত হতো এবং আল্লাহ তা'লার ফযলে তার মাধ্যমে বেশ কয়েকটি বয়'আতও হয়েছে। আল্লাহ তা'লা মরহুমের পদমর্যাদা উন্নীত করুন।

পরবর্তী স্মৃতিচারণ জনাব গোলাম মুস্তফা সাহেবের, যিনি লন্ডনে থাকতেন। অতঃপর এখানে টিলফোর্ডে স্থানান্তরিত হন। প্রাইভেট সেক্রেটারী ইউ.কে-এর দপ্তরে স্বেচ্ছাসেবী ছিলেন। গত ২৫ এপ্রিল ৬৯ বছর বয়সে তিনি মৃত্যুবরণ করেন, ইন্না লিল্লাহি ওয়া ইন্না ইলাইহি রাজেউন। ১৯৮৩ সনে চতুর্থ খলীফার যুগে তিনি বয়'আত করেছিলেন আর ১৯৮৬ সনে তিনি লন্ডনে আসেন এবং মসজিদে অবস্থান করেন। আসতেই তিনি ওয়াক্ফের জন্য আবেদন করেন। যেহেতু তার পড়ালেখা খুবই কম ছিল সেজন্য হয়ত তার ওয়াক্ফ গৃহীত হয় নি, কিন্তু তিনি একজন ওয়াক্ফে জিন্দেগীর ন্যায়ই কাজ করা অব্যাহত রাখেন। প্রথমে পাকশালায়, পরবর্তীতে দপ্তরে। আল্লাহ তা'লাও তার ব্যবসাবাণিজ্য

বিস্তৃত করেন, তার প্রতি কৃপা করেন। তিনি রিজুহস্ত ছিলেন। অতঃপর আল্লাহ তা'লা বরকত দান করেন আর কিছু সম্পত্তি ক্রয় করার সৌভাগ্য হয়। পরবর্তীতে আরো সম্পত্তি গড়ার সৌভাগ্য তিনি লাভ করেন। আল্লাহ তা'লাএত আশিসমণ্ডিত করেন যা তিনি দরিদ্রদের জন্যও ব্যয় করেছেন আর জামা'তের জন্যও ব্যয় করেছেন। কিন্তু ওয়াক্ফে জিন্দেগীর ন্যায় আমার সময়ে তিনি কীভাবে কাজ করেন তা বলছিলাম, যখনই কোন ব্যবসায়িক কাজে দপ্তর থেকে কোথাও যেতেন, দেশের বাহিরে যদি যেতে হতো অথবা ছুটি করতে হতো দীর্ঘদিন দপ্তরে আসা সম্ভব না হতো, সেক্ষেত্রে সবসময় রীতিমতো ছুটি নিতেন যে, আমার ছুটি প্রয়োজন, কেননা আমি অমুক জায়গায় যাচ্ছি:, চতুর্থ খলীফার যুগেও হয়ত এটিই তার রীতি ছিল। একজন ওয়াক্ফে জিন্দেগীর ন্যায় তিনি কাজ করেছেন এবং বলতেন, আমি ওয়াক্ফ নই ঠিকই, কিন্তু আমি নিজেকে ওয়াক্ফে জিন্দেগী মনে করি। যাহোক ওয়াক্ফে জিন্দেগীর অঙ্গীকার, যা তিনি নিজের সঙ্গে এবং আল্লাহর সঙ্গে করেছিলেন, তা অত্যন্ত বিশ্বস্ততার সাথে পূর্ণ করেছেন; রীতিমতো ওয়াক্ফে জিন্দেগী হোন বা না হোন।

প্রাথমিক পর্যায়ে মসজিদে অবস্থানকালে কেউ তাকে হোটেল চাকরি করার জন্য পাঠিয়েছিল। সেখানে তিনি ওয়েটারের চাকরি পান। এই চাকরি তার ভালো লাগে নি। তাই পরের দিনই সেই চাকরি ছেড়ে চলে আসেন আর বলেন- আমি ভাবলাম, এই কাজের চেয়ে হযরত মসীহ ম ওউদ (আ.)-এর লঙ্গরখানার প্লেট ধুয়ে দেয়াই শ্রেয়- টাকাতো আমি এমনিতেই পাচ্ছি। অতঃপর ওয়ালী শাহ সাহেবের সাথে মসজিদ ফজলের পাকশালায় কাজ শুরু করে দেন, এরপর বিশেষ নিরাপত্তা বিভাগেও কিছুদিন ডিউটি করেন। ১৯৯৩ সনে হযরত খলীফাতুল মসীহ রাবে (রাহে.) তাকে পিএস দপ্তরে কাজের দায়িত্ব প্রদান করেন আর সেই সময় থেকে আজ পর্যন্ত, যেমনটি আমি উল্লেখ করেছি, অত্যন্ত সুচারুরূপে তিনি তার দায়িত্ব পালন করতে থাকেন। মরহুম মুসীও ছিলেন। মরহুম মৃত্যুর সময় স্মৃতিচিহ্ন হিসেবে স্ত্রী ছাড়াও দুই কন্যা ও এক পুত্র সন্তান রেখে গেছেন।

তার স্ত্রী মাহমুদা মুস্তফা সাহেবা লিখেন আমার এবং মুস্তফা সাহেবের দাম্পত্যজীবন আনুমানিক ৩৪ বছরের। এই বছরগুলোর ব্যাপারে আমি সাক্ষ্য দিতে পারি যে, তার প্রতিটি পদক্ষেপ খোদা তা'লার জন্য ছিল। তিনি বহু গুণাবলীর অধিকারী ছিলেন, একজন নিষ্ঠাবান স্বামী, পিতা, ভাই এবং বন্ধু ছিলেন। আত্মীয়তার সম্পর্ক রক্ষাকারী ছিলেন। অনেক দূরদর্শী এবং সবার জন্য উপকারী, নিঃস্বার্থ সেবক, সাহসী ও নির্ভীক মানুষ ছিলেন। খিলাফতের খাতিরে জীবন বিসর্জন দিতেও প্রস্তুত ছিলেন। তিনি বলতেন, আমি যখন পাকিস্তানে বয়'আত করি তখন নিজের সাথে প্রতিশ্রুতিবদ্ধ হই যে, আমি সর্বদা খিলাফতের সান্নিধ্যে থাকব। সেই সময় তার কাছে কোন উপায়উপকরণ ছিল না, কিন্তু তিনি খোদা তা'লার কৃপায় সেই প্রতিশ্রুতি রক্ষা করেছেন। আল্লাহ তা'লা উপকরণও দিয়েছেন। আর্থিক কুরবানীর বিষয়ে গভীর আগ্রহ লালন করতেন। তিনি বলেন, আমার মনে আছে আমার পুত্র জন্ম নিলে আমি তাঁকে বললাম আমার অর্ধেক অলঙ্কার জামা'তকে দিয়ে দিব বলে স্থির করেছি। একথা শোনাযাত্রই তিনি উত্তর দেন যে, অর্ধেক কেন পুরোটা দাও। তিনি বলেন, প্রথম দিকের কথা, আফ্রিকায় মসজিদ নির্মাণের তাহরীক করা হয়। সেই সময় আমাদের কাছে ঘরও ছিল না, কিন্তু যা-ই অর্থ একত্র হতো তা মসজিদ খাতে চাঁদা হিসেবে দিয়ে দিতেন। নিজের জন্য খরচ করতে গিয়ে অতি সাবধানে খরচ করতেন, কিন্তু অন্যদের জন্য খরচ করতে হলে ভাবতেনও না। সর্বদা ধর্মকে প্রাধান্য দেয়ার পাশাপাশি একজন সত্যিকার মু'মিনের ন্যায় ধর্ম এবং জগৎ দুটোই অর্জন করেছেন। প্রত্যেক কাজে আমাকে সাথে রেখেছেন যেন সবকিছু আমার জানাথাকে আর প্রত্যেক বিষয়ে (শেষাংশ ৯ পৃষ্ঠায়...)

মহানবী (সা.)-এর বাণী

আঁ হযরত (সা.) বলেছেন: যে ব্যক্তি কুরআন পাঠ করে এবং তা হৃদয়ঙ্গম করে সে ধনী, তার কোনও প্রকার দারিদ্রের আশঙ্কা নেই।
(সুন্নাৎ সঈদ বিন মনসুর)

দোয়াপ্রার্থী: Golam Mustafa and family, Berhampore, Dist-Murshidabad

সংশোধন সম্ভব হয় বা সামান্য শাস্তি প্রদানের মাধ্যমে সংশোধন সম্ভব হয় তবে সেটি সর্বোত্তম উপায়। কিন্তু যদি সংশোধনের জন্য কঠোর শাস্তি দেওয়া আবশ্যিক হয়ে পড়ে তবে সমাজের মঙ্গলার্থে এবং নিদর্শনমূলকভাবে সেই শাস্তি দেওয়া হয়ে থাকে। এখন যদি বিষয়টিকে ধর্মীয় দৃষ্টিকোণ থেকে বিশ্লেষণ করলে বোঝা যাবে যে, ইসলামী শিক্ষায় অপরাধের শাস্তি কেবল প্রতিশোধ নেওয়ার উদ্দেশ্যে কিম্বা কষ্ট দেওয়ার উদ্দেশ্যে দেওয়া হয় না। বরং এর উদ্দেশ্য হল অন্যায়ের অবসান চাওয়া এবং ইতিবাচক পন্থায় মানুষের সংশোধন করা। কুরআন করীম অনুসারে ক্ষমা করলে বা দয়া প্রদর্শিত হয়ে যদি কোন ব্যক্তির বা সম্প্রদায়ের সংশোধন সম্ভব হয় তবে এই পদ্ধতিই অবলম্বন করা উচিত। কিন্তু ক্ষমা প্রদানের দ্বারা যদি সংশোধনের উদ্দেশ্য সাধিত না হয় তবে সমাজের সংশোধনের এবং কল্যাণার্থে শাস্তি বহাল হওয়া বাঞ্ছনীয়। এই কারণে ইসলামে শাস্তির অবধারণা এক অনন্য এবং দূরদর্শী চিন্তাধারাকে লালন করে, কেননা, এর উদ্দেশ্য হল সমাজের মঙ্গলার্থে মানুষকে প্রশিক্ষিত করে তোলা এবং সমাজে উচ্চ মানবীয় মূল্যবোধকে প্রতিষ্ঠিত করা যাতে মানুষ নিজেদের সৃষ্টিকর্তা গুণবলীকে নিজেদের সত্তায় ধারণ করার মাধ্যমে একে অপরের প্রতি যত্নবান হয়। এই কারণে ইসলাম কোন ব্যক্তির বা সম্প্রদায়ের অধিকার আত্মসাত হলে আত্মসাতকারীকে তার অপরাধের স্বরূপ অনুসারে শাস্তি প্রদানের আদেশ দেয়। কিন্তু পক্ষান্তরে, যদি শাস্তি প্রদান ব্যতিরেকে সমাজের সংশোধন সম্ভব হয় তবে এই পন্থাটিকে সর্বোত্তম বলে পরিগণিত করা হয়েছে। এই কারণেই আল্লাহ তা'লা কুরআন মজীদে সুরা নূরের ২৩ নম্বর আয়াতে বলেন, 'তাহারা যেন ক্ষমা করে এবং মার্জনা করে। তোমরা কি চাহনা যে, আল্লাহ তোমাদের অপরাধ ক্ষমা করুন। বস্তুতঃ আল্লাহ অতীব ক্ষমাশীল, পরম দয়াময়।'

অনুরূপভাবে সুরা আলে ইমরানের ১৩৫ নম্বর আয়াতে তিনি বলেন, 'যাহারা ত্রুণ সংবরণকারী ও মানুষের প্রতি মার্জনাশীল, বস্তুতঃ আল্লাহ ভালবাসেন সৎকর্মশীলগণকে।' এছাড়াও কুরআন মজীদে একাধিক স্থানে এই আদেশ রয়েছে যে, যেখানে সম্ভবপর হয় ক্ষমার পন্থা অবলম্বন করা উচিত। কেননা, প্রকৃত উদ্দেশ্য হল চরিত্র সংশোধন এবং চরিত্র গঠন, প্রতিশোধ গ্রহণ নয়।

হুযুর আনোয়ার বলেন, বিভিন্ন দেশ ও সম্প্রদায়ের মধ্যে পারস্পরিক বিরোধের মীমাংসা এবং ন্যায়নীতির দীর্ঘস্থায়ী প্রতিষ্ঠার জন্য আল্লাহ তা'লা কুরআন মজীদে সুরা হুজরাত-এর ১০ নম্বর একটি সোনালী নীতি বর্ণনা করেছেন। 'এবং যদি মো'মেনদের দুইদল পরস্পর লড়াইয়ে লিপ্ত হয়, তাহা হইলে তাহাদের উভয়ের মধ্যে তোমরা মীমাংসা করাইবে; যদি (মীমাংসার পরে) তাহাদের উভয়ের মধ্যে হইতে একদল অপর দলের উপর বিদ্রোহ করিয়া আক্রমণ করে তাহা হইলে তোমরা সকলে মিলিয়া যে বিদ্রোহ করিয়াছে তাহার বিরুদ্ধে যুদ্ধ করিয়া যাইবে যতক্ষণ পর্যন্ত না সে আল্লাহর নির্দেশের দিকে ফিরিয়া আসে। যদি সে ফিরিয়া আসে, তাহা হইলে তোমরা তাহাদের উভয়ের মধ্যে ন্যায়পরায়ণতার সহিত মীমাংসা করাইয়া দিবে এবং সুবিচার করিবে। নিশ্চয় আল্লাহ সুবিচারকারীদেরকে ভালবাসেন।' এই সমস্ত নীতি বিশ্লেষণ করলে প্রমাণ হয় যে, সমগ্র মানবজাতির প্রভু-প্রতিপালক আল্লাহ তা'লা চাহেন, আমরা যেন সকলে শাস্তির সাথে ন্যায়নীতি প্রতিষ্ঠার মাধ্যমে পরস্পর মিলেমিশে সমাজবদ্ধ হয়ে বসবাস করি।

হুযুর আনোয়ার বলেন, যতদূর ধর্মীয় শিক্ষার সম্পর্ক, ইসলামী ধর্মবিশ্বাস ধর্মীয় স্বাধীনতা এবং ধর্মীয় সহিষ্ণুতার পথিকৃত। ইসলামে প্রত্যেক ব্যক্তির কেবল নিজের ধর্মীয় স্বাধীনতাকে উপভোগ করার অনুমতিই নেই বরং তার নিজস্ব ধর্মের প্রচার ও প্রসার করারও ঢালাও অনুমতি আছে। ধর্ম এবং বিশ্বাস এই দুটি হৃদয়ের সঙ্গে সম্পৃক্ত বিষয়। এই কারণে ধর্ম অবলম্বনের ক্ষেত্রে কোন বল প্রয়োগ নেই। অথচ আল্লাহ তা'লা ইসলামকে একটি সম্পূর্ণ ধর্ম হিসেবে প্রতিষ্ঠিত করেছেন, তথাপি কাউকে জোরপূর্বক ইসলাম গ্রহণ করানোর কারোর অধিকার নেই। প্রত্যেক ব্যক্তি সে যে কোন ধর্মের প্রতিই আকৃষ্ট হোক বা না হোক তার ইসলাম গ্রহণ করার স্বাধীনতা আছে। কিন্তু

মৌলিক বিষয় হল সে যেন ইসলাম স্বেচ্ছায় গ্রহণ করে এবং ইসলাম গ্রহণ করার এই সিদ্ধান্ত সে কোন চাপের মুখে না নেয়। অনুরূপেই সে যদি ইসলাম ত্যাগ করতে চায় তবে কুরআনী শিক্ষা অনুযায়ী এমন পুরুষ বা মহিলা ইসলাম ত্যাগ করার পূর্ণ অধিকার রাখে। যদিও আমাদের পূর্ণ বিশ্বাস যে, ইসলাম একটি বৈশ্বিক ধর্ম এবং এর শিক্ষাবলী পূর্ণাঙ্গীন। তথাপি কোন ব্যক্তি যদি ইসলাম ত্যাগ করতে চাই তবে এটির তার ইচ্ছা এবং সে নিজেই এই সিদ্ধান্ত গ্রহণ করার অধিকার রাখে। সুরা মায়েদার ৫৫ নম্বর আয়াতে আল্লাহ তা'লা বলেন, যদি তোমাদের মাঝে থেকে কেউ ধর্ম ত্যাগ করে চলে যেতে চাই তবে সে চলে যাক, আল্লাহ তা'লা তার স্থানে উন্নতর এবং নিষ্ঠাবান ব্যক্তিকে নিয়ে আসবেন। সুতরাং তাকে কোন ধরণের শাস্তি দেওয়ার বা তার উপর কোন প্রকার বিধি-নিষেধ আরোপ করার কোন সরকার বা সম্প্রদায় বা ব্যক্তির অধিকার নেই। সুতরাং, এটি সম্পূর্ণ ভুল এবং ভিত্তিহীন আরোপ যে, ইসলামে ধর্মত্যাগের কোনও শাস্তি আছে। ইসলামী শিক্ষার কেন্দ্রবিন্দু হল আল্লাহ তা'লার সত্তা এবং আল্লাহ তা'লা সমগ্র মানবজাতির প্রভু-প্রতিপালক। এর অর্থ হল, যারা ইসলামের নামে কঠোরতা এবং অত্যাচারপূর্ণ কার্যকলাপ চালিয়ে যাচ্ছে তারা আল্লাহ তা'লাকে প্রভু-প্রতিপালক হিসেবে মান্য করে না। অথবা আল্লাহ তা'লা যে প্রভু-প্রতিপালক এ বিশ্বাস তারা রাখলেও কিন্তু বিষয়টি তাদের বোধগম্যের অতীত। এই কারণেই তারা ইসলামের প্রকৃত শিক্ষা থেকে বহুদূরে অবস্থান করছে।

হুযুর আনোয়ার (আই.) বলেন, আমরা আহমদীরা বিশ্বাস করি যে, এমন ভুলের সংশোধনের জন্য আল্লাহ তা'লা যুগের ইমাম জামাত আহমদীয়ার প্রতিষ্ঠাতাকে আবির্ভূত করেছিলেন। তিনি আমাদেরকে বলেন, ধর্মীয় যুদ্ধের যুগ এখন অতীত, এবং আল্লাহ তা'লা চান যে, মানুষ যেন শান্তি ও সম্প্রীতির সঙ্গে পরস্পরের অধিকার প্রদান করার মাধ্যমে বন্ধুত্বপূর্ণভাবে জীবন যাপন করে। এই প্রসঙ্গে তিনি নিজের জামাতকে উপদেশ দিতে গিয়ে বলেন, ইসলামের প্রকৃত শিক্ষার দিক থেকে ধর্মের দুটি অংশ রয়েছে বা বলা যেতে পারে যে, ধর্ম দু'টি স্তরের উপর প্রতিষ্ঠিত। প্রথমতঃ এক-অদ্বিতীয় খোদাকে পূর্ণ বিশ্বাসের সাথে সনাক্ত করা, এবং তাঁর প্রতি নিষ্ঠা, ভালবাসা এবং ভালবাসার যাবতীয় দাবী পূর্ণ করার মাধ্যমে তাঁর বশ্যতা স্বীকার করা। দ্বিতীয়তঃ তাঁর সৃষ্টির সেবা করা এবং নিজের যাবতীয় শক্তি ও সামর্থ্যকে অপরের সেবার্থে নিয়োজিত করা। কোন সশ্রুট হোক বা প্রশাসক হোক বা সাধারণ মানুষ, যে স্বতঃপ্রণোদিতভাবে পূণ্য কর্ম করে, প্রতিদানে আপনিও তার সঙ্গে কৃতজ্ঞতাপূর্বক সদাচারণ করুন। এবং তাঁর সঙ্গে সর্বদা ভালবাসার সম্পর্ক বজায় রাখুন।

এরপর হুযুর (আ.) সুরা নাহলের ৯১ নম্বর আয়াতের তফসীর বর্ণনা করেন, যে আয়াতটির অর্থ হল, 'নিশ্চয় আল্লাহ সুবিচার ও উপকার সাধন করিবার এবং আত্মীয়স্বজনকে (দান করিবার ন্যায় অন্য লোকদিগকেও) দান করিবার আদেশে দিতেছেন এবং (সর্বপ্রকার) অশ্রীলতা ও মন্দ কার্য এবং বিদ্রোহ করিতে বারণ করিতেছেন'। আয়াতটির তফসীর বর্ণনা করে বলেন, খোদা তা'লা চান যে, তোমরা যেন সমগ্র মানবমণ্ডলীর প্রতি ন্যায় নীতি অবলম্বন কর। এর দ্বারা মুসলমানদেরকে আদেশ প্রদান করা হয়েছে যে, তারা যেন ঐ সমস্ত মানুষের প্রতি পূণ্য কর্ম করে যারা তোমাদের প্রতি কোন পূণ্য কর্ম করে নি। এরপর তিনি এও বলেন যে, এটি মুসলমানদের কাছে দাবি করে যে, তারা যেন খোদা তা'লার সৃষ্টির সাথে এমন পর্যায়ের সহানুভূতিপূর্ণ আচরণ করে যেন তারা নিজেরই আত্মীয়। যেকোন একজন মা নিজের সন্তানের প্রতি আচরণ করে।' এখানে হুযুর (আ.) বলছেন, প্রত্যেক মুসলমান যেন জাতি, ধর্ম ও বর্ণ নির্বিশেষে সকল মানুষকে এমনভাবে ভালবাসে যেকোন মা তার নিজের সন্তানকে ভালবাসে। কেননা, এটি হল অকৃত্রিম, নির্ভেজাল ও উৎকৃষ্ট পর্যায়ের ভালবাসা। দ্বিতীয় পর্যায়ে মানুষ যেখানে একে অপরের প্রতি অনুগ্রহপূর্ণ আচরণ করে সেখানে এমন সন্তানবনাও নিহিত থাকে যে, অনুগ্রহকারী তার অনুগ্রহের বড়াই করবে এবং প্রতিদানে

Mob- 9434056418

শক্তি বাম

আপনার পরিবারের আসল বন্ধু...

Produced by:

Sri Ramkrishna Aushadhalaya

VILL- UTTAR HAZIPUR
P.O. + P.S.- DIAMOND HARBOUR
DIST- SOUTH 24 PGS. W.B.- 743331
E-mail : saktibalm@gmail.com

দোয়াপ্রার্থী:
Sk Hatem
Ali, Uttar
Hajipur,
Diamond
Harbour

মহানবী (সা.)-এর বাণী

আঁ হযরত (সা.) বলেছেন: যে ব্যক্তি কারো মধ্যে কোন ক্রটি বা দুর্বলতা দেখা সত্ত্বেও তা গোপন রেখেছে, তার উপমা সেই ব্যক্তির ন্যায়, যে সমাধিস্ত এক জীবিত শিশুকন্যাকে কবর থেকে উদ্ধার করে তার প্রাণ রক্ষা করেছে। (সুনান আবু দাউদ)

দোয়াপ্রার্থী: Jaan Mohammad Sarkar & Family,
Keshabpur (Murshidabad)

(খুতবার শেষাংশ ...)

আমার ওপর পূর্ণ আস্থা রাখতেন। এরপর বলেন, মোস্তফা সাহেব তার পরিবারের মধ্যে একমাত্র আহমদী ছিলেন। তিনি যখন বয়আত করেছিলেন তখন নিজের সাথে প্রতিশ্রুতিবদ্ধ হন যে, পৈত্রিক উত্তরাধিকার থেকে কোন কিছুই নেবেন না আর দোয়া করেন যে, হে আল্লাহ! যদি তোমার মসীহ সত্য হয় আর আমি সত্য বুঝেই বয়আত করেছি, তাহলে আমাকে যা দেওয়ার তোমার পক্ষ থেকেই দিও আর দুনিয়ার কারো মুখাপেক্ষী করোনা। আল্লাহ তা'লা তার এই আকাঙ্ক্ষা পূর্ণ করেছেন আর প্রমাণ করেছেন যে, তুমি বয়আতের যে পদক্ষেপ নিয়েছ তা সঠিক। আল্লাহ তা'লা বিভিন্ন ভাবে তাকে সাহায্যও করেছেন। তার নিজ গ্রামের লোকেরা কোন না কোন সময় আহমদী হবে- এ বিশ্বাস নিয়ে তিনি সেখানে বড় মসজিদ বানিয়েছেন। এছাড়া নিজ আত্মীয়-স্বজন, ভাই-বোনদের বিভিন্নভাবে সাহায্য-সহযোগিতা করতেন। তার স্ত্রী বলেন, নিজ দোয়া কবুলিয়তের ওপর তার পূর্ণ বিশ্বাস ছিল আর এসংক্রান্ত অনেক ঘটনা তিনি লিখেছেন।

তার মেয়ে সাবিহা মোস্তফা বলেন, আমার বাবার জীবনের উদ্দেশ্য ছিল আল্লাহ তা'লার সত্তা এবং তাঁর প্রতিষ্ঠিত খিলাফত-ব্যবস্থাকে ভালোবাসা। আল্লাহ তা'লার প্রতি অগাধ আস্থা ছিল, সব সময় আমাদের বলতেন যে, আমি অমুক সময় এই দোয়া করেছি যা এভাবে গৃহীত হয়েছে। তিনি সর্বদা খলীফাতুল মসীহর তাবাররুক হস্তগত করার চেষ্টা করতেন। কোন স্থান থেকে পেলে এ থেকে নিজের অংশ অবশ্যই সুরক্ষিত করে রাখতেন এবং পরবর্তীতে অল্প অল্প করে লোকদের মাঝে বিতরণও করতেন যেন তারাও এ থেকে কল্যাণমণ্ডিত হতে পারে। তিনি জলসায় আগত মেহমানদের দেয়ার জন্যও তাবাররুক ঘরে জমা করতেন। তিনি বলেন, আমার পিতার অনেক পরিচিত লোকজন আমাকে ফোন করে বলেছেন যে, আজকে আমাদের মনে হচ্ছে আমরা আবার এতিম হয়ে গেলাম। তিনি দরিদ্রদের অনেক বেশি সাহায্য করতেন। তিনি আরও বলেন, লগুন থাকাকালে যখন আমরা টুটিং থেকে গ্রোসেনহল রোডে স্থানান্তরিত হই তখন আমার পিতা যথাসাধ্য বড়ঘর নেয়ার চেষ্টা আরম্ভ করে দেন যেন হযরত মসীহ মওউদ (আ.)-এর অতিথিদের পূর্ণমাত্রায় সেবা করার সৌভাগ্য লাভ হয়। তিনি সবসময় বলতেন, কখনো বাড়ি নিলে খিলাফতের ছায়াতলেই (অর্থাৎ কেন্দ্রের নিকটেই) নিতে হবে, কখনো এখান থেকে দূরে যাওয়া যাবে না। তিনি লিখেন, আমার পিতা অত্যন্ত নিষ্ঠা ও আন্তরিকতার সাথে সকলের সাহায্য-সহযোগিতা করতেন। কেউ কোন দুঃখ কষ্টের সম্মুখীন হলে সেই অবস্থার যাতে উত্তরণ ঘটে এর জন্য যথাসম্ভব চেষ্টা করতেন। তার অসুস্থ হওয়ার কয়েকদিন পূর্বেও তিনি আমাকে যে শেষ উপদেশ দিয়েছিলেন তা হলো, সর্বদা জামা'তের সাথে সম্পৃক্ত থাকবে, নিয়মিত নামায ও কুরআন পাঠ করবে, তাহলে আল্লাহ তা'লা সর্বদা তোমার সাথে থাকবেন।

প্রথমে ছোট মেয়ের কথা উল্লেখ করা হয়েছে। তার বড় মেয়ে মাদীহা মুস্তফা লিখেন, যদিও আমার পিতা গ্রাম থেকে এসেছিলেন এবং তেমন শিক্ষিত ছিলেন না, তথাপি তার চিন্তাভাবনা ও দূরদর্শিতা এবং জীবনযাপনের রীতিনীতি অনেক শিক্ষিত লোকের চেয়েও তাকে অনেক এগিয়ে নিয়ে গেছে। আজকাল পৃথিবীতে এমন মানুষ অনেক কমই আছে যারা প্রকৃত অর্থেই পুরুষ ও নারীকে সমমর্যাদা প্রদান করে। তিনি তার কন্যাদের কখনোই বোঝা মনে করেন নি, বরং প্রায়শই বলতেন যে, যার কন্যা সন্তান হয়েছে সে পার পেয়ে গেছে, তার কাজ কর্মের দিন শেষ আর আরামের দিন শুরু। তিনি লিখেন, তার ছেলে মেয়ে উভয়েরই পড়াশোনা ও তরবীতের কাজটি তিনি অত্যন্ত সুচারুরূপে ও সমানভাবে সম্পন্ন করেছেন আর এতে কোন ক্রটি করেননি। তবে সন্তানদেরকে ভালোবাসা সন্তোষ ও আল্লাহ এবং তাঁর বান্দার

প্রাপ্য প্রদানের ক্ষেত্রে কখনো ক্রটি করেন নি। ঈদ হোক বা নিজের মেয়ের বিয়ে বা অন্য যে কোন কাজই হোক না কেন, তিনি নামায পড়া কখনো ছাড়েন নি। আল্লাহ তা'লার প্রতি তার অগাধ আস্থা ছিল। তিনি নিশ্চিত ছিলেন যে, তার কোন কাজ অসম্পন্ন থাকবে না। তবে তার কোন দুশ্চিন্তা থেকে থাকলে শুধু এই বিষয়ে ছিল যে, আল্লাহ তা'লার উপাসনার ক্ষেত্রে কোন ক্রটির কারণে আবার আল্লাহর বিরাগভাজন না হয়ে যান।

তার পুত্র সরফরাজ মাহমুদ বলেন, যখন আমরা টুটিং-এ বসবাস করতাম, তখনও নিয়মিত নামায আদায়ের জন্য মসজিদ ফযলে যেতেন। কখনো কোন নামায মসজিদে গিয়ে আদায় না করলে পারলে এটি নিশ্চিত করতেন যে, আমরা সবাই যেন ঘরে বাজামা'ত নামায আদায় করি। তিনি বলেন, আমাকে বলতেন, তুমি জীবনে যা অর্জন করতে চাও কেবলমাত্র এক অদ্বিতীয় খোদাই তোমাকে তা দিতে পারেন। যখন নামাযের সময় হতো তখন অন্য সকল কাজ ছেড়ে প্রথমে নামায আদায় করতেন। তার পুত্র বলেন, পনেরো বছর বয়স পর্যন্ত আমাকে নিয়মিত ফজরের নামাযে নিয়ে যেতেন। অধিকন্তু তিনি বলেন, তার দেয়ার কল্যাণই আমরা লাভ করছি। ফজরের নামাযের পর মসজিদ থেকে এসে দেখতেন যে, আমি মসজিদে গিয়েছিলাম কি না? কোন সময় অলসতা প্রদর্শন করলে বলতেন, আল্লাহ তা'লার সাথে বিশৃঙ্খলা রক্ষা না করলে তোমারই ক্ষতি হবে। আল্লাহ তা'লার তোমার নামাযের প্রয়োজন নেই। প্রত্যেক ব্যক্তি তার নিজের জন্য নামায আদায় করে। তিনি বলেন, অসুস্থতার সময় আমরা যখন এম্বুলেন্স ডেকে পাঠাই তখন তাঁর নিঃশ্বাস নিতে খুব কষ্ট হচ্ছিল, কিন্তু তখনও শোয়া বা বসার পরিবর্তে দাঁড়িয়ে নামায আদায় করছিলেন। হাসপাতালে যাওয়ার সময় যখন সিঁড়ি দিয়ে নামছিলেন বারবার এটিই বলেছেন যে, সবসময় সময় মতো ও বাজামা'ত নামায আদায় করো।

ঘর যখন বড় ছিল তখনও হযরত মসীহ মওউদ (আ.)-এর মেহমানদের আতিথেয়তা করতেন। জলসার সময় চল্লিশ জনের মতো মেহমান থাকত তাতে। যখন মসজিদের কাছে বাড়ি নেয়া হয় তখন ঘর ছোট ছিল, সেখানেও পঁচিশ জনের সংকুলান হতো। এই ঘরেও পঁচিশ জন মেহমানের জায়গা হওয়া খুবই কঠিন ছিল। কিন্তু তারপরও অনেক আনন্দের সাথে আতিথেয়তা করতেন। আমিও কয়েক বার তাকে জিজ্ঞেস করেছি। তিনি বলেছেন, আমরা কোনভাবে থাকি আর ঘর মেহমানদেরকে দিয়ে দেই। তিনি সবসময় বলতেন, ধর্ম ও পার্থিবতা- উভয়টি সাথে নিয়ে সম্মুখে এগোতে হবে, কিন্তু একথা স্মরণ রাখ যে, এ কাজ সহজ নয়, জাগতিক কোন বিষয় যখনই সামনে আসে তখন ধর্মকে সর্বদা জাগতিকতার ওপর অগ্রাধিকার দিবে- তিনি সর্বদা সন্তানদের এই উপদেশই দিয়েছেন। তিনি বলেন, আমাকে সর্বদা এই উপদেশ দিয়েছেন যে, আমাদের সবকিছু আল্লাহর জামা'তের আমানত, তাই আমাদের কাজ হলো এর সুরক্ষা করা আর এই উদ্দেশ্যে এ আমানতকে বর্ধিত করতে হবে যেন তা জামা'তের কাজে আসতে পারে। সর্বদা উপদেশ দিতেন যে, চাঁদা প্রদানে কখনো বিলম্ব করবে না। মাসের প্রথম দিনই তিনি নিজের চাঁদা পরিশোধ করতেন আর বলতেন, একথা মনে করো না যে, আমাদের চাঁদার জামা'তের প্রয়োজন আছে, বরং চাঁদা দেওয়ার ফলে আমরা আল্লাহ তা'লার নিয়ামতরাজিকে আকর্ষণ করতে পারব। তিনি বলেন, অসুস্থতার শেষ দিনগুলোতে যখন ভেন্টিলেটর লাগানো হয়, কোমা'য় যাওয়ার পূর্বে (পরবর্তীতে কোমা'য় চলে গিয়েছিলেন) তিনি আমাকে শেষ যে কথা বলেছিলেন তা ছিল, সরফরাজ! আমি জানি যে, মাসের প্রথম দিন পার হয়ে গেছে, গিয়ে আমার আলমারীতে দেখ, সেখানে সব ফাইল-পত্র রাখা আছে, আমার চাঁদার হিসাবনিকাশ লেখা আছে, আমার সম্পূর্ণ চাঁদা পরিশোধ কর। সর্বদা আমার উপদেশ স্মরণ রাখবে, প্রত্যেক মাসের প্রথম দিন সম্পূর্ণ চাঁদা পরিশোধ করবে আর এক্ষেত্রে কখনো বিলম্ব করবে না।

মহানবী (সা.)-এর বাণী

আঁ হযরত (সা.) বলেছেন: যে ব্যক্তি কারো মধ্যে কোন ক্রটি বা দুর্বলতা দেখা সত্ত্বেও তা গোপন রেখেছে, তার উপমা সেই ব্যক্তির ন্যায় যে সমাধিস্থ এক জীবিত শিশুকন্যাকে কবর থেকে উদ্ধার করে তার প্রাণ রক্ষা করেছে।

(সুনান আবু দাউদ)

দোয়াপ্রার্থী: Begum Aseya Khatun, Hahari (Murshidabad)

যুগ ইমাম-এর বাণী

“সর্বদা সত্যের সঙ্গ দাও।”

(মালফুয়াত, ৩য় খণ্ড, পৃ: ১১৫)

দোয়াপ্রার্থী: Azkarul Islam, jamat Ahmadiyya Amaipur (Birbhum)

তার শ্বশুর কেলামত উল্লাহ সাহেব বলেন, স্নেহের মোস্তফা তার স্ত্রীর রক্তসম্পর্কের আত্মীয়-স্বজনের সাথে গভীর নিষ্ঠার সাথে আত্মীয়তা রক্ষা করেছেন আর অধমকে তার আপন পিতার মর্যাদা দিয়েছেন। মোস্তফা সারা জীবন খোদা তা'লার ইবাদত আর খিলাফতের চরণে সেবা করে কাটিয়েছেন।

একইভাবে তার জামাতা বেলাল সাহেব বলেন, কুরআনের বিভিন্ন দোয়া এবং হযরত মসীহ মওউদ (আ.)-এর অমৃত বাণীর ফটোকপি সংগ্রহ করে আমাকে এবং তার সব সন্তান, বন্ধু-বান্ধব এবং আত্মীয়-স্বজনদের দিতেন। আর বলতেন, এগুলো পাঠ কর আর কুরআনের দোয়াগুলো মুখস্ত কর। তিনি বলেন, আমি দেখেছি- মসজিদ ফযলে যে দরস দেওয়া হতো তার কপি সংগ্রহ করে তা বাড়িতে নিয়ে এসে পুনরায় পড়তেন আর সবাইকে পড়ার জন্য দিতেন, আর মুঠোফোনে সেগুলোর ছবি তুলে নিজের অন্যান্য অ-আহমদী ভাই-বোন এবং তাদের সন্তানদেরও প্রেরণ করতেন। এরপর তাদেরকে ফোন করে জিজ্ঞেস করতেন যে, তারা পড়েছে কি-না? এভাবে তবলীগ করতেন। খুবই অতিথিপারায়ণ ছিলেন। সাধারণ দিনগুলোতে প্রায় প্রতিদিনই কাউকে না কাউকে অতিথি হিসেবে বাসায় নিয়ে আসতেন আর জলসার দিনগুলোতে তো চকিশ ঘন্টা অতিথিদের যাতায়াত থাকতো। সবাইকে (তিনি) একথাই বলতেন যে, জিজ্ঞেস করার দরকার নেই, নিজের ঘর মনে করে এসে যোগ।

হযরত মসীহ মওউদ (আ.)-এর অতিথিদের তিনি বিশেষভাবে অনেক অগ্রাধিকার দিতেন, সর্বদা বলতেন, আমার দ্বার উন্মুক্ত রয়েছে। কেউ যদি একবার জলসার সময় তার বাসায় থাকার জন্য যেত আর পরের বছর অন্যত্র অবস্থান করত তাহলে খুবই চিন্তিত হতেন যে, আমার হয়ত কোন ভুল হয়ে গেছে, অতিথি সেবার কোন ঘটতি থেকে গেছে, যে কারণে তিনি (এবার আর) আসেন নি। এরপর সুযোগ পেলে জোর করে তাকে নিজ বাড়িতে নিয়ে আসতেন। নিজের অন্যান্য জাগতিক কাজকর্ম এবং ব্যবসা বাণিজ্যকে এমনভাবে গুছিয়ে রেখেছিলেন যেন নামাযে কোন বিঘ্ন না ঘটে। কাজকর্ম বাদ দিয়ে মসজিদে পৌঁছে যেতেন।

একইভাবে তার শ্যালক সোহেল আহমদ চৌধুরী সাহেব বলেন, তিনি এমন একজন মানুষ ছিলেন, তিনটি বিষয়ের প্রতি যার উন্মাদের মতো ভালোবাসা বা আকর্ষণ ছিল, প্রথমত ইবাদত, দ্বিতীয়ত খিলাফতের সাথে সম্পর্ক আর তৃতীয়ত অতিথিসেবা। মোস্তফা ভাইয়ের বাসাটি জলসার দিনগুলোতে হযরত মসীহ মওউদ (আ.)-এর অতিথিতে পরিপূর্ণ একটি সরাইখানার দৃশ্য তুলে ধরত।

আমাদের প্রাইভেট সেক্রেটারী দপ্তরের কর্মী আসলাম খালেদ সাহেব বলেন, দপ্তরে তার সাথে আমাদের নিত্যদিনের সম্পর্ক ছিল। অনেক গুণের অধিকারী ছিলেন- নিষ্ঠুর, পুণ্যের ক্ষেত্রে অগ্রগামী, দরিদ্রদের লালনকারী, অতিথিপারায়ণ, চাঁদার ক্ষেত্রে অনন্য, সকল প্রকার পুণ্য কাজের সুযোগ সন্ধান করতেন, দপ্তরে লোভীর ন্যায় সবার কাছ থেকে কাজ ছিনিয়ে নিয়ে নিজে করতে উন্মুক্ত হয়ে থাকতেন। তিনি বলতেন, এটিই আমার উপার্জন। আর সঠিকভাবে কাজ সম্পাদিত হলে আনন্দিত হতেন।

প্রাইভেট সেক্রেটারী দপ্তরের স্বচ্ছসেবী কর্মী ফাহিম আহমদ ভাট্টি সাহেব বলেন, সম্ভবত ১৯৯২ সাল থেকে তিনি এই দপ্তরে কাজ করা আরম্ভ করেন। তখন কর্মচারীর স্বল্পতা ছিল। অত্যন্ত বিশ্বস্ততার সাথে কাজ করতেন। একজন বিশ্বস্ত ও নিবেদিত প্রাণ কর্মী ছিলেন। বহু গুণের আধার ছিলেন, যার মাঝে সবচেয়ে উল্লেখযোগ্য, প্রিয় ও ঈর্ষণীয় বৈশিষ্ট্য ছিল খিলাফতের প্রতি আন্তরিক ভালোবাসা, আনুগত্য ও অনুগত থাকা আর ছোট ছোট বিষয়ে দিক-নির্দেশনা নেওয়া। আল্লাহ তা'লা তাকে আর্থিক স্বাচ্ছন্দ্য দান করেছিলেন- এর উল্লেখ করার সময় সর্বদা বলতেন যে, এই দপ্তরে কাজ করা এবং এই দ্বারের কল্যাণেই আমি সবকিছু পেয়েছি।

ডাক্তার তারেক বাজওয়া সাহেব বলেন, ১৯৮০/৮১ সন থেকে (তার সাথে) আমার বন্ধুত্বের সম্পর্ক। আহমদীয়াত গ্রহণ থেকে নিয়ে মৃত্যু বরণ পর্যন্ত তাকে অনেক কাছ থেকে দেখার সুযোগ হয়েছে। বহু গুণের আধার, আল্লাহ তা'লার প্রতি ভরসাকারী এবং খিলাফতের প্রেমিক ছিলেন। সিন্ধু (প্রদেশে) এসে তার দূর-সম্পর্কের এক আত্মীয়ের বাসায় বসবাস আরম্ভ করেন, কেননা

পাঞ্জাবে তার বিরুদ্ধে জমিজমার কারণে মামলা হয়। সেখানকার পুলিশের দৃষ্টি এড়িয়ে তিনি এখানে আসেন। যাহোক, সেখানেই আহমদীয়াতের সাথে পরিচয় ঘটে। আর অনবরত তিন বছর পর্যন্ত তার সাথে তবলীগ চলতে থাকে। তখনও তিনি সেখানে তাদের অর্থাৎ আহমদীদের মসজিদে নিয়মিত আযান দিতে থাকেন, এই আগ্রহ তার শুরু থেকেই ছিল। অবশেষে তিনি একটি স্বপ্ন দেখার পর তাৎক্ষণিকভাবে বয়আত করেন। সেই স্বপ্ন ছিল, ঘরে হযরত খলীফাতুল মসীহ সালেস (রাহে.) আসেন এবং মুচকি হেসে বলেন, দুই জন খোদাম প্রয়োজন। এরপর সেলিম সাহেব ও তার অর্থাৎ মুস্তফা সাহেবের প্রতি ইশারা করে বলেন যে, তুমি আর তুমি চলে আস। এরপর তিনি বয়আত করেন। বয়আতের পূর্বেই তিনি জামাতের ইজতেমা ইত্যাদিতে অংশগ্রহণ করতেন। বয়আতের পর তিনি নিষ্ঠার ক্ষেত্রে অনেক উন্নতি করেন। মনোযোগের সাথে খুতবা এবং প্রশ্নোত্তর শুনতে শুনতে তার মাঝে এতটা আত্মবিশ্বাস সৃষ্টি হয়ে গিয়েছিল যে, তিনি বলতেন, আমি একাই অ-আহমদী মৌলভীদের জন্য যথেষ্ট, আমার সামনে কেউ দাঁড়াতে পারবে না। তিনি বেশ কয়েকবার ওমরাহ করার তৌফিক লাভ করেছেন। এরপর ২০১০ সনে আল্লাহ তা'লা তাকে হজ্জ করারও সৌভাগ্য প্রদান করেন। কাতিয়ানের প্রতিও তার ভালোবাসা ছিল। পূর্বে প্রায়-ই সেখানে যেতেন। মরকযে বা কেন্দ্রে ঘর নির্মাণের বাসনা ছিল। সেখানে ঘর বানিয়ে পরবর্তীতে তা জামাতকে দান করে দেন।

ডাক্তার ইব্রাহীম নাসের ভাট্টি সাহেব তার চিকিৎসা করছিলেন, তিনি বলেন, গোলাম মুস্তফা সাহেবের সাথে আমার পরিচয় বেশি দিনের নয়। সর্বশেষ অসুস্থতার সময় কনসালটেন্ট হিসেবে তার দেখাশোনা করার সুযোগ হয়েছে। তিনি হাসপাতালে ডাক্তার ছিলেন আর ঘটনাচক্রে মুস্তফা সাহেব তার রোগী হয়ে আসেন। তিনি বলেন, তাকে শেষ অসুস্থতার সময় দেখার সুযোগ হয়েছে। এই সামান্য সময়ে কিছু এমন বিষয় নোট করেছি যা উল্লেখযোগ্য। তিনি বলেন, করোনা হামলার তীব্রতা সত্ত্বেও তিনি গভীরভাবে আল্লাহ তা'লার সন্তুষ্টিতে সন্তুষ্ট ছিলেন। আমার স্বরণ আছে, আমি তার কাছে গিয়ে তাকে সম্বোধন করে বলি, অসুস্থতার তীব্রতার কারণে হয়ত আরোগ্য লাভ সম্ভব হবে না। এটি শুনে মুস্তফা সাহেব কিছুক্ষণ নিশ্চুপ থাকেন, এরপর বলেন, আল্লাহ তা'লা যা চান তাতেই আমি সন্তুষ্ট। তার চেহারা দুঃখ এবং চিন্তার কোন লক্ষণ ছিল না, খুবই প্রশান্তচিত্ত ছিলেন। ডাক্তার সাহেব বলেন, দ্বিতীয় যে বিষয়টি আমাকে প্রভাবিত করেছে তা হলো, খিলাফতের প্রতি ভালোবাসা। রোগের তীব্রতার কারণে আমাদের সি.পি.এ.সি. লাগানোর প্রয়োজন হতো। এটি অক্সিজেন দেয়ার জন্য খুবই কষ্টদায়ক একটি মেশিন, যা কখনো কখনো মানুষকে খুবই অস্থির করে তুলে আর কষ্টের কারণে ভয়াবহ অবস্থার সৃষ্টি হয়। মেশিন লাগানোর কারণে যখন তার কষ্ট আরম্ভ হতো তখন তার পরিবারের সদস্যরা এসে তাকে বলতো যে, যুগ খলীফার বার্তা হলো, (হুযূর বলছেন অর্থাৎ আমার পক্ষ থেকে তারা বলে যে, হুযূর বলেছেন) ডাক্তারদের নির্দেশনা পালন করুন। তিনি আমার এই বার্তা পেয়ে সহসাই শান্ত হয়ে যেতেন আর শান্তভাবে মেশিনকে সহ্য করতেন। তখন মনে হতো তার সাহস বৃদ্ধি পেয়েছে এবং দেহে তাৎক্ষণিকভাবে বল ফিরে এসেছে। অনুরূপভাবে তিনি আরো বলেন, আমি দেখেছি যে, তিনি হোমিওপ্যাথিক ঔষধ এজন্য খেতেন না যে, আরোগ্য লাভ হবে, বরং শুধু এজন্য খেতেন কেননা আমি তাকে ব্যবস্থাপত্র প্রস্তাব করেছিলাম। ডাক্তার সাহেব বলেন, খিলাফতের সাথে তার ভালোবাসা ও নিষ্ঠার সম্পর্ক এতটা অনন্য যে, আমি এতে মুগ্ধ না হয়ে পারি নি।

আল্লাহ তা'লা সকল মরহুমের মর্যাদা উন্নীত করুন। যে বিশ্বস্ততা তারা খোদা তা'লা ও তাঁর ধর্মের প্রতি প্রদর্শন করেছেন আর যেভাবে তারা নিজেদের বয়আতের অঙ্গীকার পালনের চেষ্টা করেছেন আল্লাহ তা'লা তার চেয়ে অধিক স্নেহ তাদের দান করুন। হযরত মসীহ মওউদ (আ.) যেমনটি বলেছেন, এরা শহীদদের অন্তর্ভুক্ত। আল্লাহ তা'লা তাদের সন্তানদেরও নিজ সুরক্ষাবেষ্টনীতে রাখুন, আর তাদের পুণ্যকর্মসমূহ ধারণ করার ও জারি রাখার তৌফিক দান করুন। তারা আল্লাহ তা'লার সাথে সম্পর্ক সৃষ্টিকারী হোক আর জামাত ও খিলাফতের সাথে সর্বদা বিশ্বস্ততার সম্পর্ক রক্ষাকারী হোক। আর তাদের পিতামাতা তাদের জন্য যে দোয়া করেছেন আল্লাহ তা'লা সর্বদা তাদের পক্ষে তা গ্রহণ করুন। (আমীন)

খোদা তা'লার সাথে সাক্ষাতই হল ঈদের প্রকৃত খুশি

সকলে আনন্দে থাকুন, এটিই আল্লাহ তা'লার কাছে দোয়া করি। আনন্দে থাকা এবং অপরকে আনন্দের রাখার অধিকার আমাদের স্বাভাবিক অধিকার। যদি কেউ সব কিছু খোদা তা'লার ফজলে অর্জন করে তবে তাকে সাধুবাদ। কিন্তু অবশ্যই তা বৈধ উপায়ে হওয়া বিধেয়। বর্তমানে মানুষ কারোর অধিকার হরণ করেও উৎফুল্লিত হয়। কারোর অধিকার আত্মসাৎ করে, কারোর সর্বস্ব লুণ্ঠন করে বা কারোর উপর মিথ্যা অপবাদ আরোপ মানুষ পুলকিত হয়। কিন্তু খোদা তা'লার বান্দা সেই ব্যক্তিই যে কারোর অধিকার আত্মসাৎ করা বা কারো কোন ক্ষতি সাধন ছাড়াই আনন্দ লাভ করতে পারে। এই প্রকৃত আনন্দ মানুষ নিজের সকল কামনা-বাসনাকে বিসর্জন দিয়ে খোদা তা'লার সমীপে পূর্ণ আনুগত্য ও সমর্পণের মধ্য দিয়ে অর্জন করে। আর এটাই ঈদের উদ্দেশ্য।

মুসলমানরা বছরে দুইবার ঈদের মাধ্যমে আনন্দ উদযাপন করে থাকে। খুশির কারণ হল যে আমরা আল্লাহ তা'লা ও আঁ হযরত (সা.) -এর নির্দেশ মেনে ঈদ যাপন করি। বস্তুত এই দুটি ঈদই আত্মত্যাগ দাবী করে। ঈদুল ফিতরের কুরবানীর ক্ষেত্রে একমাস যাবৎ আমরা নিজেদের বৈধ কামনা-বাসনা থেকে বিরত থাকি। অপরদিকে খোদা তা'লার সন্তুষ্টি অর্জনের জন্য কঠোর অধ্যবসানা ও উপাসনায় নিয়োজিত থাকি। প্রকৃতপক্ষে রমযান মাস আমাদের উৎসর্গকরণের প্রেরণা স্বরূপ যা আমাদেরকে সংযম ও ধৈর্যপূর্ণ জীবনযাপনের শিক্ষা দেয়। যথা সময়ে পাঁচ বর নামায পড়া, তাহাজ্জুদে আকুল ক্রন্দন, কুরআন মজীদার বেদনাকর্ষণে তিলাওয়াত করা, সেহরী ও ইফতারীর সময় জিকরে ইলাহি ও নিষ্ঠাসহ দরুদ পাঠ, দরিদ্রের সেবা করা, দান-খয়রাতের প্রতি প্রবণতা, লড়াই বাগড়া, গালমন্দ, ঈর্ষা-বিদ্বেষ, পরচর্চা ও পরনিন্দা প্রভৃতি নানাবিধ অসৎ কর্ম ও কু-অভ্যাস থেকে বিরত থাকা-এগুলি এমন ফল যা থেকে আমরা শুধু নিজেরাই লাভবান হই না, বরং আমাদের বাড়ির ছোটরাও এর থেকে লাভবান হয়। অতএব, আল্লাহ তা'লার কাছে দোয়া করা উচিত যে এই বরকতমণ্ডিত মাসে তিনি আমাদেরকে সৎ কর্ম সম্পাদনের জন্য যে শক্তি দিয়েছেন তাকে পাথেয় করে আমরা যেন পরবর্তী রমযান পর্যন্ত এই ধারা অব্যাহত রাখতে পারি। এই প্রসঙ্গে সৈয়্যাদানা হযরত আমীরুল মোমেনীন খলীফাতুল মসীহ আল খামিস (আই.) তাঁর ২৮ শে অক্টোবর, ২০০৫ সালের খুতবা জুমআয় বলেন:

“ একটি বর্ণনায় রয়েছে, হযরত আবু ইমামা (রা.) থেকে বর্ণিত যে আঁ হযরত (সা.) বলেছেন, যে ব্যক্তি শুধু মাত্র আল্লাহ তা'লা খাতিরে দুই ঈদের রাত্রিতে ইবাদত করবে তাঁর অন্তর চিরকালের জন্য সজীব থাকবে। তার অন্তর সেই সময়ও নিষ্প্রাণ হবে না যখন সমগ্র জগতের অন্তর নিষ্প্রভ হয়ে পড়বে।

(ইবনে মাজা, কিতাবুস সিয়াম, বাব-মা জাআ ফি সোয়াবিল এতেকাফ)

অতএব, লক্ষ্য করুন যে রমযান মাসের মধ্যে যে পবিত্র পরিবর্তন সাধিত হয় সেটাকে চিরস্থায়ী করতে আঁ হযরত (সা.) কিরূপ চমৎকার ভঙ্গিতে অনুপ্রাণিত করেছেন। কারণ ঈদের আনন্দে অনেকেই ভুলে যায় যে নামাযও পড়া উচিত। তাই রাত্রের ইবাদতের দিকে মনোযোগ আকর্ষণ করে আঁ হযরত (সা.) আমাদেরকে বলেছেন যে তোমরা ফরয নামায তো অবশ্যই পড়বে, কিন্তু যদি খোদা তা'লার সন্তুষ্টি সর্বদার জন্য অর্জন করতে চাও তবে রাত্রিকে তোমরা ইবাদত দ্বারা সুসজ্জিত কর। আর এই ধারা রমযানের পরেও যেন অব্যাহত থাকে। বিশেষ করে এমন সময়ে যখন কোনও আনন্দের উপলক্ষ্য আসে, মানুষ অন্যদিকে বেশি মনোযোগী হয়ে পড়ে, হইহুল্লোড় ও আনন্দ-উৎসব ও নেমনতলে মেতে সময় নষ্ট করে না। অতএব ইবাদত আমাদের জীবনের অবিচ্ছেদ্য ও চিরস্থায়ী সঙ্গী হওয়া কাম্য।

একমাস যাবৎ কুরবানীর প্রতিদানে আমরা ঈদ উদযাপন করি। বান্দা তার প্রকৃত বন্ধুর সাথে মিলিত হওয়ার বাহ্যিক রূপকে ঈদের নামাযের মাধ্যমে প্রকাশ করে। এই মিলন যত ঘনিষ্ঠ হবে, ঈদও তত সুমধুর হবে আর এর গুরুত্বও তত বৃদ্ধি পাবে। এই বিষয়টিকে স্পষ্ট করতে গিয়ে হযরত মুসলেহ মওউদ (রা.) বলেন: “ আল্লাহ তা'লার সাথে মিলনই প্রকৃত আনন্দ। পৃথিবীর

যে কোনও স্থানেই যাও না কেন তুমি ঈদের এই অর্থের কোনও তারতম্য দেখবে না। আর দুঃখ কাকে বলে? দুঃখ হল বিরহ বেদনা। তাঁর সাথে মিলিত হওয়ার নাম, ঈদ, মিলন যত ঘনিষ্ঠ হবে, ঈদও তত সুমধুর হবে। লোকেরা নামাযের জন্য একত্রিত হয়, এটাও এক প্রকার ঈদ। কিন্তু তা কেবল সেই পাড়ার লোকদের জন্য। লোকেরা জুমার দিন নামাযের জন্য একত্রিত হয়, সেটা শহরের লোকের জন্য ঈদ। ঈদে এলাকার লোক একত্রিত হয়, এটা তাদের ঈদ। হজ্জের সময় পৃথিবী সমস্ত মুসলমানদের ঈদ, কেননা এক্ষেত্রে পৃথিবীর সমস্ত মুসলমান একত্রিত হয়। আর এটা বড় ঈদ। অতএব যতক্ষণ প্রকৃত মিলন সংঘটিত না হয়, ততক্ষণ ঈদ কিভাবে হতে পারে? আমাদের জন্য সেই ঈদ কল্যাণকর যা সকলকে একত্রিত করে। দুনিয়ার রীতি-নীতি আমাদের শিক্ষা দেয় যে, ঈদ সেটাই যার মধ্যে মিলন নিহিত। আর সেই মিলন যা আমাদের জন্য কল্যাণকর। অর্থাৎ, ঈদ সেই সত্তার সহিত মিলনের নাম যার সহিত মিলিত হয়ে পরম তৃপ্তি লাভ হয়। আর তার বিরহ বেদনা অসহনীয় দুঃখসম। যে সত্তার সাথে মিলিত হলে কল্যাণ লাভ হয়, সেটি কোন্ সত্তা? নিজের নিজের অবস্থার প্রতি লক্ষ্য করে দেখ। স্ত্রী ও সন্তানদের সঙ্গে সাক্ষাত হওয়া উভয়ের আনন্দের কারণ। এক বন্ধু অপর বন্ধুর সাথে মিলিত হয়ে আনন্দিত হয়। এক প্রতিবেশীর অপর প্রতিবেশীর সাথে মিলনে কল্যাণ নিহিত রয়েছে।..... অতএব প্রকৃত ঈদ হল খোদা তা'লার সাথে সম্পর্ক স্থাপন করা এবং তাঁর সাক্ষাত লাভ করা। যদি এটা সম্ভব হয় তবে সকল আশিস ও কল্যাণ থেকে আমরা লাভবান হব। সকল সুখ-স্বাচ্ছন্দ ও প্রশান্তির উপকরণ আমাদের হাতের নাগালে থাকবে। আর যে ব্যক্তি এই কৃচ্ছসাধন করতে পারবে, তার জন্য প্রতিটি দিনই যেন ঈদ। অতএব ঈদ কী? ঈদ হল খোদার সাথে সাক্ষাত। ঈদের দিন থেকে শিক্ষা গ্রহণ কর এবং খোদার সাথে সাক্ষাতলাভে সচেষ্ট হও। এমন প্রচেষ্টা কর যেন অলসতা তোমার উপর প্রভাব ফেলতে না পারে। তাঁকে অর্জন করলে পৃথিবীর এমন কোনও দুঃখ নেই যা দূরীভূত হবে না। আর এমন কোন সুখ-স্বাচ্ছন্দ নেই যা তাঁর আয়ত্তে নেই। যে খোদা তা'লাকে লাভ করে, মৃত্যু সম্পর্কে সে থাকে নির্লিপ্ত। কোন ক্রোধ তাকে দুঃখ দিতে পারে না। অতএব, যদি প্রকৃত ঈদ চাও, তবে একটাই উপায়। নতুন বস্ত্র পরিধান করা এবং উৎকৃষ্ট ও উপাদেয় খাদ্য গ্রহণের মাঝেই ঈদের স্বার্থকতা নয়, বরং যদি খোদা তা'লার সাথে সম্পর্ক তৈরী হয়ে যায় এবং এর মাধ্যমে বান্দার সংশোধন সম্ভব হয় তবেই তা প্রকৃত ঈদ বলে গণ্য হবে। আর ঈদ যদি কারোর জীবনে একবার এসে যায় তবে অমর হয়ে থাকে। এই ঈদের দিনের না কোন প্রভাত আছে না কোন গোধূলি বেলা আছে। এই দিন সময় ও কালের মধ্যে সীমাবদ্ধ নয়। তাই সেই ঈদও অনন্ত ও সীমাহীন। অপর এক ঈদ যা মর্যাদা ও গুরুত্বের বিচারে এর চাইতে ছোট, কিন্তু এরও গুরুত্ব অনস্বীকার্য। আর তা হল আল্লাহর বান্দা সাথে ভালবাসার সম্পর্ক স্থাপন করা। কেননা আল্লাহর সঙ্গে আমাদের ভালবাসার সম্পর্ক এটাই দাবী করে। আমাদের জন্য পূর্ণাঙ্গ ঈদ ও আনন্দের দিন সেটাই হবে যেদিন সারা জগতের কোনও ব্যক্তি আমাদের থেকে বিচ্ছিন্ন থাকবে না। অতএব এরজন্য সচেষ্ট হওয়া এবং এই কাজের নিজের সর্বশক্তি ও সামর্থ্য ব্যয় করার যেন আমাদের জন্য প্রকৃত ঈদের আগমণ ঘটে।

(খুতবা ঈদুল ফিতর, প্রদত্ত ৮জু, ১৯২১)

হুযুর আনোয়ার আমাদেরকে প্রত্যেক ঈদে এই বিষয়টির দিকে দৃষ্টি আকর্ষণ করেন যে আমরা ঈদের প্রকৃত খুশি তখনই উপলব্ধি করতে পারব যখন আমরা নিজের গরীব ভাইদের ও তাদের সন্তানসন্ততিদেরও এই খুশিতে যোগ করে নিব। আমরা যেন প্রত্যেক গরীব আহমদীদের বাড়িতে যাই এবং তাদের সঙ্গে সম্মিলিতভাবে ঈদ উদযাপন করি, তাদেরকে উপহার সামগ্রী দিই।

আল্লাহ তা'লা আমাদেরকে পবিত্র রমযান মাসে সম্পাদিত পুণ্যের ধারা অব্যাহত রাখার তৌফিক দিন এবং প্রকৃত ঈশী মিলন ঘটুক। (আমীন)

(বদর পত্রিকা, ৯ আগস্ট, ২০১২ -এর সংখ্যা অবলম্বনে)

মহানবী (সা.)-এর বাণী

আঁ হযরত (সা.) বলেছেন: তোমাদের নিকট যখন কোন জাতির সম্মানীয় কোন ব্যক্তি আসে তখন তাকে যথাযোগ্য সম্মান দাও।

(সুনান ইবনে মাজা)

দোয়াপ্রার্থী: Saen Mir and Family, Kogram, Nalhati (Birbhum)

যুগ খলীফার বাণী

নিজেদের ব্যবহারিক নমুনার মাধ্যমে আশপাশের মানুষের সামনে ইসলামের অনিন্দ্য সুন্দর শিক্ষা তুলে ধরতে হবে।

(বেলজিয়াম জলসার সমাপনী ভাষণ, ২০১৮)

দোয়াপ্রার্থী: Shamsheer Ali and family, Jamat Ahmadiyya Sian, (Birbhum)

<p>EDITOR Tahir Ahmad Munir Sub-editor: Mirza Safiul Alam Mobile: +91 9 679 481 821 e-mail: Banglabadar@hotmail.com website: www.akhbarbadrqadian.in www.alislam.org/badar</p>	<p>REGISTERED WITH THE REGISTRAR OF NEWSPAPERS OF INDIA AT NO PUNBEN/ 2016 / 70524</p> <p>সাপ্তাহিক বদর Weekly BADAR Qadian কাদিয়ান Distt. Gurdaspur (Pb.) INDIA Qadian - 143516</p>	<p>MANAGER NAWAB AHMAD Mob: +91 9417 020 616 e.mail: managerbadrqnd@gmail.com</p>
<p>POSTAL REG NO GDP- 43 / 2020 -2022</p>		<p>Vol. 5 Thursday, 4 June , 2020 Issue No.23</p>

ANNUAL SUBSCRIPTION : Rs.500/- (Per Issue : Rs. 9/-) (WEIGHT: 20-50 gms/issue)

নিজেদের সর্বশক্তি ও যোগ্যতাকে কাজে লাগিয়ে জ্ঞানের জগতে এমন সব কীর্তি করে দেখান যেন মুসলমান জাতি আঁ হযরত (সা.)-এর একনিষ্ঠ প্রাণদাস হযরত মসীহ মওউদ (আ.)এর অনুসারীদের মাধ্যমে নিজেদের হত গৌরব ফিরে পায়।

আমার দোয়া হল আল্লাহ তা'লা আপনাদের জ্ঞান ও মারেফাতে উন্নতি দান করুন। আপনাদের চিন্তাধারায় বুদ্ধিদীপ্ততা এনে দিন এবং মানুষের জন্য এক কল্যাণকর সত্তায় পরিণত করুন। আমীন।

নাযারত তালিম (কাদিয়ান)এর পক্ষ থেকে অনুষ্ঠিত আহমদীয়া মুসলিম রিসার্চ স্কলার্স সম্মেলন উপলক্ষ্যে হুযুর আনোয়ার (আই.)-এর বিশেষ বার্তা

পি.এইচ.ডি ওয়ার্কশপে অংশগ্রহণকারী প্রিয় সদস্যবৃন্দ! আসসালামো আলাইকুম ওয়া রহমতুল্লাহি ওয়া বরকাতুহু

আমি একথা জেনে ভীষণ আনন্দিত হলাম যে কাদিয়ানে একটি ওয়ার্কশপ অনুষ্ঠিত হচ্ছে যাতে অংশগ্রহণকারীরা পি.এইচ.ডি সম্পন্ন করেছেন বা বর্তমান করছেন। আল্লাহ তা'লা এই আয়োজনকে সার্বিকভাবে সাফল্যমণ্ডিত করুন এবং এর শুভ পরিণাম সৃষ্টি করুন। আমীন।

এই উপলক্ষ্যে আমাকে বার্তা প্রেরণের অনুরোধ করা হয়েছে। আমার দোয়া হল আল্লাহ তা'লা আপনাদের জ্ঞান ও মারেফাতে উন্নতি দান করুন। আপনাদের চিন্তাধারায় বুদ্ধিদীপ্ততা এনে দিন এবং মানুষের জন্য এক কল্যাণকর সত্তায় পরিণত করুন। আমীন।

এটি আল্লাহ তা'লার বড়ই অনুগ্রহ যে আপনারা মসীহ মওউদ (আ.)-কে মানার তৌফিক পেয়েছেন, যাকে আল্লাহ তা'লা জামাতের উন্নতি এবং অনুসারীদের জ্ঞান ও আধ্যাত্মিকতায় উৎকর্ষ সাধনের মহা সুসংবাদ দান করেছেন। তিনি বলেন:

“খোদা তা'লা আমাকে বারবার এই সংবাদ জানিয়েছেন, তিনি আমাকে বহু সম্মানে বিভূষিত করবেন এবং মানুষের হৃদয় আমার ভক্তিতে আঁপুত করবেন। তিনি আমার অনুসরণকারীদের জামাতকে সারা জগতে বিস্তৃত করবেন এবং তাদের সকল জাতির উপর জয়যুক্ত করবেন। আমার অনুসারীরা এরূপ অসাধারণ জ্ঞান ও তত্ত্ব-দর্শিতা লাভ করবে, তারা স্ব-স্ব সত্যবাদিতার জ্যোতিতে এবং যুক্তিপূর্ণ প্রমাণ ও নিদর্শনাবলীর প্রভাবে সবার মুখ বন্ধ করে দিবে।”

(তাজাল্লিয়াতে ইলাহিয়া, রুহানী খাযায়েণ, খণ্ড-২০, পৃ: ৪০৯)

জ্ঞান ও তত্ত্ব-দর্শিতায় উৎকর্ষ লাভ করার চেষ্টা করা প্রত্যেক আহমদীয়া দায়িত্ব, যাতে তারা এই ঐশী সুসংবাদের সত্যায়নস্থল হয়ে উঠতে পারে। নিঃসন্দেহে আপনারা উচ্চ শিক্ষায় শিক্ষিত বা উচ্চ শিক্ষা অর্জন করেছেন, কিন্তু স্মরণ রাখবেন, জ্ঞানের চূড়ান্ত সীমা বলে কিছু নেই আর উন্নতির যাত্রাপথ কখনও শেষ হয় না। মানুষ সারা জীবন শিখতেই থাকে। আপনারাও নিজেদের জ্ঞান ক্রমাগত বৃদ্ধি করতে থাকুন এবং আল্লাহ তা'লার কাছে জ্ঞান-বৃদ্ধির জন্য দোয়াও করতে থাকুন। হযরত মুসলেহ মওউদ (রা.) একবার বলেছিলেন, রেলগাড়ি কিনা জাহাযে বসে আমার মনে বাসনার উদ্বেক হয়, এগুলি যদি আহমদীদের তৈরী করা হত এবং এই কোম্পানিগুলির মালিক আহমদী হত।

(তারিখ আহমদীয়াত, খণ্ড-১৭, পৃ: ১০১)

তাঁর এই পুণ্যময় বাসনাটির কথা আপনারা সব সময় মাথায় রাখবেন এবং নিজেদের সর্বশক্তি ও যোগ্যতাকে কাজে লাগিয়ে জ্ঞানের জগতে এমন

সব কীর্তি করে দেখান যেন মুসলমান জাতি আঁ হযরত (সা.)-এর একনিষ্ঠ প্রাণদাস হযরত মসীহ মওউদ (আ.)এর অনুসারীদের মাধ্যমে নিজেদের হত গৌরব ফিরে পায়।

আল্লাহ তা'লা আপনাদেরকে এর তৌফিক দান করুন। আপনাদেরকে প্রতি পদে নিজ সমর্থন দান করুন। তিনি আপনাদেরকে এমন কাজ করা তৌফিক দান করুন যা মানবজাতির জন্য কল্যাণকর। আল্লাহ তা'লা আপনাদের সহায় হোন এবং আহমদীয়াতের আকাশে উজ্জ্বল নক্ষত্রে পরিণত করুন। আমীন।

ওয়াসসালাম, খাকসার

মির্য়া মসরুর আহমদ

খলীফাতু মসীহ আল খামিস।

৮ পাতার পর....

অনুগ্রহের আকাঙ্ক্ষাও পোষণ করবে। কিন্তু তা সত্ত্বেও মায়ের ভালবাসা সম্পূর্ণ নিঃস্বার্থ হয়ে থাকে, এবং সন্তানের প্রতি তার ভালবাসার সম্পর্ক এমনই অনন্য হয়ে থাকে যে, সে তার জন্য সমস্ত কিছু ত্যাগ করতে প্রস্তুত থাকে, কিন্তু সে কোন প্রকার প্রতিদানের আকাঙ্ক্ষী হয় না বা কোন প্রকার প্রশংসার মুখাপেক্ষীও হয় না। এই কারণেই এটি হল সেই পরম মার্গ ইসলাম যার শিক্ষা দিয়ে থাকে। যে দৃষ্টিকোণ থেকে মুসলমানদেরকে সমগ্র মানবজাতির প্রতি এমন ভালবাসা রাখার শিক্ষা দেওয়া হয়েছে যে রূপ একজন মা তার সন্তানকে ভালবাসে। এটিই ইসলামের প্রকৃত শিক্ষা।

হুযুর আনোয়ার (আই.) বলেন, আল্লাহ তা'লার আদেশ হল, আল্লাহ তা'লা চান তাঁর প্রতি ঈমান আনে তারা যেন যার তাঁর গুণাবলীকে নিজেদের মধ্যে ধারণ করে। অতএব, কারোর প্রতি অত্যাচার করা একজন মুসলমানের পক্ষে সম্ভবই নয়। অনুরূপভাবে কোন প্রকার অন্যায়ে, অত্যাচার এবং চরমপন্থার অনুমতি দেওয়াও ইসলামের পক্ষে সম্ভব নয়।

হুযুর আনোয়ার (আই.) বলেন, বিগত কয়েক বছরে বহুবার ইসলামের মৌলিক শিক্ষার এই বিষয়গুলি আমি বর্ণনা করেছি। হুযুর বলেন, আমি একাধিক বার কুরানের উদ্ধৃতি দিয়ে প্রমাণ করেছি যে, আমি যা কিছু বলেছি তা ইসলাম সম্মত শিক্ষা। তথাপি এটিও বাস্তব যে, আমাদের শান্তির বার্তাকে সংবাদ মাধ্যমে ব্যাপকভাবে প্রচার করা হয় না। অথচ এর বিপরীতে সেই সকল মুষ্টিমেয় মানুষদেরকে বিশ্ব মিডিয়ায় অনবরত প্রচার করা হয় এবং অনেক বেশি গুরুত্ব দেওয়া হয় যারা যাবতীয় প্রকারের জুলুম, অত্যাচার ও হত্যাকাণ্ডে লিপ্ত রয়েছে।

(ক্রমশ...)

যুগ ইমামের বাণী

তোমরা নিজেদের মনকে সরল করিয়া এবং জিহ্বা চক্ষু ও কর্ণকে পবিত্র করিয়া তাঁহার দিকে অগ্রসর হও, তাহা হইলে তিনি তোমাদিগকে গ্রহণ করিবেন।
(কিশতিয়ে নূহ, পৃ: ২৫)

দোয়াপ্রার্থী: Abdus Salam, Nararvita (Assam)

যুগ খলীফার বাণী

“দোয়া, সদকা ও দানের মাধ্যমে শান্তি থেকে পরিত্রাণ লাভ এমন এক প্রমানিত সত্য, যা এক লক্ষ চব্বিশ হাজার নবী দ্বারা স্বীকৃত।”
(মালফুযাত, ৩য় খণ্ড, পৃ: ২৫)

দোয়াপ্রার্থী: Sabina Yasmin, Bilaspur (Chhattisgarh)